

ርእሰ ኢሰያስ ናይ ፈደሬሽን ሩሳዩ ዝያረቱ እንዴ ኣትመመ ኣቅበለ

ርእሰ ኢሰያስ ኣፈወርቂ፡ እብ ዐዙመት ርእሰ ቫላድሚር ፑቲን፡ ዲብ ፈደሬሽን ሩሳዩ ወደዮ ለኣሰመነ ናይ 5 ኣምዕል ረስምየት ዝያረቱ እንዴ ኣትመመ ሰንበት ዐባይ 4 ጁን ሳዕት 6:00 ኣሰቦሕ ኣቅበለ።

ርእሰ ኢሰያስ ምን ሞስኮ ዲብ ትበገስ እተ ኢነት እብ ናይ ሕሽመት ኣሴራር ወወጠንያይ ኣናሺድ ኤራትርያ ወሩሰዩ ለተሌት ዓደት ሰርሐ ገብኣት እግሉ።

ርእሰ ኢሰያስ ዲብ ሩሳዩ ዲብ ጸንሐ እተን ኣምዒላት፡ ምስል ርእሰ ቫላድሚር ፑቲን ውበዕዳም ሰብ ሰልጠት ፈደሬሽን ሩሳዩ ዲብ ጠወርት ዕላቀት ወሽራኽት ክልኢትን ለድወል ክምስልሁመ ናይ ሕበር ኣህምየት ዲብ ቡ ናይ መንጠቀት ወእድዥ ቅደይ

ወተጠውራቱ ህድገው።

ዲብለ ወደወ ናይ ክልኢቱ ድወል ናይ ሰልፍ መዋጀሃት፡ ርእሰ ፑቲን ናይ ሰልፍ ዝያረት ረስምየት ርእሰ ኢሰያስ ዲብ ፈደሬሽን ሩሳዩ፡ ዲብ ገበይ ዐቦት ለዐለት ናይ ዕላቀት ዲብ ኣደቀቦት ምህም ዶር ክምስል ተኣግዜ ዳምን ክምቱ ዲብ ሽሬሕ፡ ርእሰ ኢሰያስ ህዬ ሩሳዩ ምስል ሓዘየት ሰላም ወዐዳለት ራቴዕ እድንያይ ብዝሓ ንዛም ዋጅብ ወዶረ እግል ተኣግዜ ኣትፋቀደ።

ወዚር ካርጅየት ኣሰይድ ዐሰማን ሳልሕ ወመፈወድ ዓዳት ወርያደት ሰፊር ዘመዴ ተክሌ ምስል ርእሰ ኢሰያስ ኣፈወርቂ ሱፍራም ዐለው።

ተቅሪር ዝያረት ርእሰ ኢሰያስ ዲብ ፈደሬሽን ሩሳዩ እት ገጽ 6 እብ ርሒቡ ህለ እግልኩም።



ሓጋት፡ መድረሰት ሐርስ ወቴክኒክ 156 ደረሳይ ኣድሐረት

መድረሰት ሐርስ ወቴክኒክ ሓጋት፡ እግል 2 ሰነት እብ ፍዕል ወሽርሕ ለኣድረሰቶም 75 ኣዋልድ ለብኡቶም 156 ደረሳይ እብ ሸሃደት ኣድሐረት።

ለትደሐረው፡ 36 እብ መጃላት ኣግሮ-መካኒክ፡ 43 እብ ዕሉም ንዋይ፡ 41 እብ ዕሉም ሸትል፡ 36 ህዬ እብ ዕሉም ትርበት ወግይ ወዕሉም መስኖ ድራሰቶም ታብዐው።

እት ዮም 3 ጁን እተ ገኣት

21ይ መናሰበት መድሐራት፡ ሙዲርለ መድርሰት መምህር ዮናስ እዮብ፡ ለትደሐረው እት መንበርሆም እግል ትሰደዮም ለትቀድር ምህነት ተዕሊም ራክባም ክምስል ህለው ሐበረ።

እት ውዛረት ተዕሊም ሙዲር ዓም ቅስም ቴክኒክ፡ ተዕሊም ምህናት ወተእሂል ኣሰይድ ተሰፋይ ሰዩም እብ ጀህቱ፡ ለትደሐረው እብ እግሉ ራክባም ህለው ምህናት ተእሲር ሰኒ ክምስል ወዱ ሰእየቱ ሸርሐ።

ወኪለ ትደሐረው ህዬ፡ ለእግሉ ከሰበው ደርሰ፡ እብ መትሰባል ክምስል ከድሞ እቡ ኣክደ።

እት ደንጎቤ ንቃዋ ወቁል ለሰጀለው ጀዋእዝ ተህየቡ።

እት ሰነት 1999 ከደማት ለኣንበተት መድረሰት ሐርስ ወቴክኒክ ሓጋት፡ ኣሰክ 1082 ኣዋልድ ለብኡቶም፡ 2979 ደረሳይ ክም ኣድሐረት ወሳይቀ ለኣፍህም።



ወጠንያይ እምተሓን 8ይ ፈሰል ምን ዮም 7-9 ጁን

ወጠንያይ እምተሓን 8ይ ፈሰል ሰነት ድራሰት 2022/2023፡ ምን ዮም ኣርቦ 7 ጁን እንዴ ኣንበተ ኣሰክ ጅምዐት 9 ጁን እት ክለ ለዐድ፡ ክምስልሁመ እት ጅደ ወርያድ፡ ሰዑድያ ወከሰለ ሱዳን እተ ህለ እድንያይ መዳርስ እት 456 መራክዝ እምተሓን እግል ልትህየብ ቲ።



እት ውዛረት ተዕሊም መስኡል ውሕደት ወጠንያይ እምተሓን መምህር ሀብቱ ኣሰፊህ እግል ኤሪነ እተ ሀበዩ ሐብሬ፡ ዮም ዓመት እብ ዓመት 48 ምእታይት ኣዋልድ ለብኡቶም ዝያድ 67 ኣልፍ ደረሰ እግል ልሻርኩ ክምቱ ሸርሐ።

ዕልብ መሻርኩት እብ ኣቅሊም ልትርኤ እት ህለ፡ 8,782 እት ኣቅሊም ዐንሰቤ፡ 23,396 እት ኣቅሊም ግብለት፡ 12,337 እት ኣቅሊም ጋሽ-ኣርኩ፡ 16,509 እት ኣቅሊም ምግብ፡ 5,109 እት ኣቅሊም ቅብለት በሐር ቀየሕ ወ952 እት ኣቅሊም ግብለት በሐር ቀየሕ ገብኦ እት ህለው፡ 226 ደረሳይ እት ጅደ ወርያድ፡ 43 ህዬ እት ከሰለ ለለኣምትሕኖ ቶም።

እትሊ እብ ማዳት ሕሳብ፡ እንግሊዝ፡ ዕሉም እጅትማዕየት፡ ዕሉም ወተርብዩ ወጠንያይ ለልትህየብ ወጠንያይ እምተሓን፡ 31 ናይ ቃትን ኣሲሪንመ ክም ሻርኩ ተኣመረ።

ዕልብ መምትሕነት ምስል ናይ ደዓም ልትርኤ እት ህለ፡ እብ 22 ምእታይት ዐቦት ክምስልቡ ለሸርሐ መምህር ሀብቱ፡ ለበርናምጅ ክምስለ ወጅቡ ፈዓሊ እግል ልግበኦ፡ ቀደም እለ እግል መስኡሊን መራክዝ እምተሓን፡ ሙደርሲን ወደረሰ እብ ክሱሰ ሸሩጣት እምተሓን ሐብሬ ካፍየት ክምስል ተህየቡ፡ ወለእምተሓን እት ክሉ መራክዝ እት ሐቱ ሳዕት ክምስል ልትህየብ ኣትኣመረ።

መምህር ሀብቱ እት ደንጎቤ፡ ክሉም መስኡሊን መራክዝ፡ ሙደርሲን ወሃይብት እምተሓን ለተህየቡቶም መስኡልየት እብ ዋጅብ እግል ልሰርግሎ ወለወቅት እት ክሉ መራክዝ እግል ልትሐሸም ትፋኑ።

ወጠንያይ ውፋቅ

“እት እዳክ ለሀላ ደሀብ፣ መጅብ ቀሰብ” እት ልትበህል ክመ ልትመሰል፡ ሕነ አዳም ለበዝሐ ወክድ መሻክልነ ኢጉብእ ምን ጉብእ፡ ጠምጠም ኢነአዳውር። ለሀሌነ እቱ ወቅት፡ እብ ቀላል ለልትረኩብ ሰበት መሰለኒ፡ ዐውል ኢነህይቡ። ሰኔትነ ወርዝቅነ ለእንፍህም፡ ብዕድ መቃርን ተየልል ዱቅሪ እብ ፍዕል ዶል ሳድፈነ አውመ ምን ቃብል ዶል ነአነጽኖ ሌጣ ቱ።

ለሀሌነ እቱ ወክድ፡ እት ብዝሓት ድወል ወገባይለን፡ ወክድ ረብሸት ሲያሰት፡ ደግሽ ወወክድ መትዐዳዋይ ቱ። ወክድ ፈንጨጋር፡ ጀራይም ወዐጉብ ቱ። እብ አጅናሱ፡ ደያናት፡ ወቀባይል ወእብ ብዕድ እጅትማዕያይ ሸክል እንዴ ትካፈልኩ፡ ኖሰኖስከ መትቃታል ወመትዐዳዋይ፡ ርዝቅ ወጠን ወሸዐብ ጌዳን እበ አለበ ፈሳድ ወሰርቅ እት ናይ ብሕቶት መናፌዕ አውዐሎት ወዘሚት ዲብ ድወል ብዝሓት ለሀላ ተየልል ቱ።

“ረብሸት ሱግ፡ መፍቶት ሲርቀት” ክመ ልትበህል፡ ምን ፍንጊር ወክላፋት እንክሰብ ለልብሎ መስኡሊን አዝማት እግል ገባይል ዐለምን ብዞሕ ዲብ ናይ ረብሸት ወኢመስኩብት መንበረት እንዴ ወሐለው፡ ዘማቴሆም እግል ለአድምኖ፡ እብ ስሜት ዲሞቅራዊት፡ ብዝሐሕ ሕዝብያት ሲያሳት፡ እብ ስሜት ሐቅ አደሚ ወሕርየት ደያናቱ ወብዕድ፡ እግል መጅተመዕ እብ ክል እንክራቱ እንዴ ጋምዐው፡ ለናይ ከርስ መስኩብት ለልአደምን ዓዳት ወሕሽሞታት እግል ሐምረጎት ለንዝሕዎ ደዓያት ህዬ፡ እግል መሻክል ለኬልም ቱ። እብሊ ሰብብ፡ ደማን ለበ ሰላም ወመስኩብት ከርስ አክዶት፡ ዎሮት ምን አግደ መሐለኪት ገባይል ጋብእ ሀለ።

ሸዐብ ኤረትርየ፡ እብ ፈድለ እግል ሕርየቱ ለወደዩ ወጠንያይ ንዳል እቱ እበ ለደፍዐዩ እስትሸሃድ ሕበር ለበዛዩ ትርድት ወጠንያይት ውሕደት፡ ጥወር መዋቅፍ ሲያሰት፡ ሳክብ ወቃሰን ተየልል ዲብ ከሊቅ ምነ ለትዐወተ ገባይል ዎሮት ቱ። እብ መጅብላ ህሊናህ መንጠቀት ልግበእ ወእብ መጅብላ እት ለትፈናተ ድወል ለሀላ ሓድር ተየልል፡ ኤረትርየ እብ ናይ ከርስ ሰላም ወመስኩብት፡ ትሩድ ወጠንያይ ውፋቅ ወውሕደት፡ ንዙም ዕላቃት ሸዐበ ክም መሰል ሰኔት ለትትዐለብ ደውለት ቱ።

ደውለት ለወዳክ አሳሳት፡ ረዩም፡ ክቡድ ወግምጩይ ቱ። ለበዝሐ ድወል ዐለምን፡ እብ ፍንቱይ ህዬ፡ ለእብ ሄራር ሃድእ ለኢመጽአዩ፡ እብ እስትዕማር ለትአሰሰዩ ድወል፡ እት ቀበተን ለትፈናተ ናይ ቀባይል ወሀገጊቱ፡ ናይ ዓዳት ወደያናት ሸክል ለበን ተን። ሰበት እሊ፡ ደውለት ብቅዕት እግል ልብኔ ለፈክር መጅተመዕ፡ መዋጥኒኑ እምበል ፈናታይ ቀባይል፡ ሀገጊት፡ ደያናት፡ ጅንሰ ወእጅትማዕያይት ጠበቀት ወብዕድ፡ እብ ውፋቅ ወሕሽመት ሕድ ለልትናበር፡ እት ጅንሰየት ለትበኔት ወጠንያይት ውሕደት ለልአክድ፡ ከጥ ዋዴሕ ወአሳሲ መተብየት ለአትሐዝዩ፡ ሐቅ ወዐዳለት ኩሉ ከፈፍል መጅተመዕ እት ሚሳቅ ወጠን እብ ሰጅሎት ሌጠ ላኪን፡ ወጠንያይት ውሕደት ትደመን በህለት ኢኮን። እግል ፈዓልየት ራቴዕ ሀደፍ እማነት ትርድት ሕኩመት፡ ምን አህዳፍ ወጠንዳት ለሸክፈ ዋይዲባት ወላዋሽ-እደይ ለልአፈሸል፡ ፈዛዐት ሸዐብ ትርድት፡ ናይ በረ ህጁማት እብ በቃዐት ለዳፌዕ ትሩድ ዲሸ ወጠኒ ጠልብ።

ከወጠንያይ ውፋቅ ገድም፡ ዎሮት ምን ዐላይም ቅየም ሕር ኤረትርያ ቱ። እድንያይ ወናይ መንጠቀት ሐቃይቅ ለልአትፋቅደነ ዎሮ ዐቢ እሰባት ሀለ ምን ጉብእ ህዬ፡ እግል እት ሄራር ንዳል ወእስትሸሃዱ እግል ነአክደ ለቀደርነ ወጠንያይት ውሕደት ወመትካሙ፡ ሰላም ወመስኩብት እግል ትዕጀበነ ሌጠ እንዴ ኢትጉብእ፡ እግል ንዕቀበ ወነአደቅበ ክም ብና ቱ።

ልጅነት፡ ቅብም ጀሪደት

ኤረትርየዐጃላክ

ክል አርቡዕ ለትጠ'በዕ ጀሪደት

መዳልያይ፡-

መሐመድ እድሪስ

ላይአውት ወአርተዖት

* ዘህረ ዐሊ

* ፋጥነ አድም

ተለፎን፡ 121797/07121322

ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284

32^ይ ዒድ ሕርየት እት ለፈናተ ድወል እብ ነያረት ተዐየደ



32^ይ ዒድ ሕርየት፡ “ምስትንክር፡ ሄራር ሰባተት” እበ ትብል ስቅራት ዲብ መዳይን ኬንዩ፡ ኢጣልዩ፡ ጀርመን፡ አሜሪካ፡ ድወል መንጠቀት ግብለታይ አፍሪቀ፡ ኡጋንድ፡ ኢማራት ወሞንትርያል-ከነድ፡ እብ ነያረት ተዐየደ።

ዲብ ኬንዩ ዲብ ዮም 28 ማዮ ለጉብእ ዒድ፡ ኤረትርየን ሰካን ናይሮቢ ዲብሎማሰዩን ኬንዩ ወፈተች ኤረትርየ፡ ለሻረከው እቱ ዒድ፡ ሰፊር ደውለት ኤረትርየ ዲብ ኬንዩ አሰይድ በዩኔ ርእሶም ዲብ ቀደመየ ከሊመት፡ ዲብ እሊ ለሐልፈ ቅሩብ ወክድ ርኢስ ኢሰያስ አፈወርቂ ዲብ ኬንዩ ለወደዩ ዝያረት እንዴ አሸረ፡ ዕላቀት ኤረትርየ ወኬንዩ ምነ ዐለተ እግል ጠወሮት ለአመመ ክምሰልቱ አከደ።

ዲብ እሕትፋል ናይ ሸረፍ ጋሽ ዲብ ውሳረት ካርጀየት ኬንዩ አሚን ዓም ዶክቶር ኮሪር ሲንገዩ እብ ጀህቱ ዲብ ቀደመየ ከሊመት፡ ኤረትርየ ዲብ ኢጋድ ዕድውየተ ምን አጀደደት ሐምዴሁ ዲብ ቀድም፡ ኤረትርየ መሻረከተ ዲብ ናይ መንጠቀት ሰላም ወመስኩብት እግል ሊዚድ እት ልትሐሰብ፡ መትከሳት ሰፋረት ኬንዩ ዲብ ኤረትርየ ዲብ ወክድ ሐጨር እት ፍዕል እግል ልውዐል ክምቱ ሐበረ።

ዲብ ኢጣልዩ እትለ አምዕል እለ ዲብ መዳይን ሚላኖ፡ ቦሎን፡ አብሩዞ፡ ፈረንሳይ ወጀኖወ ዲብ ጉብእ ዒድ ህዬ፡ ሰፊር ፍሰሐዴን ጴጥሮስ እት መዲነት ሚላኖ ዲብ ቀደመየ ከሊመት፡ እግል ክሉ ለሐለፍናሁ መራሕል እንዴ ተዐዲነ ዲብ ረህየት ለብእተ ደረጀት ክምሰል በጽሐኒ፡ ክሉ ናይ ምስተቅበል መዳፈዐትነ ህዬ፡ ዐድነ እግል ዐመሮት ወመናበረት ሸዐብነ

እግል ሐሰኖት ክምቱ ሐበረ።

ዲብ መናሰበት ፈተች ወመሳኒት ኤረትርየ ሲያሰዩን ወሱሕፍዩን ናይ ተእዩድ ልእኮታቶም አትሐላለፈው።

ዲብ ድወል መንጠቀት ግብለታይ አፍሪቀ በህለት ዛምብዩ፡ ዚምባብዌ፡ ቦትሰዋን፡ ግብለት አፍሪቀ ወሌሴቶ ለትብሮ ኤረትርየንም ዒድ ሕርየትነ እብ ገማል ለዐዩዱ ዲብ ህለው፡ ሰፊር ደውለት ኤረትርየ ዲብ ግብለት አፍሪቀ ወድወል ግብለታይ አፍሪቀ አሰይድ ሳልሕ ዑመር ዐብዱ እግል ዒድ ሕርየት እንዴ አሸረ ከሊመት ቀደመ።

ዲብ መዳይን ማንሃይም ወብዕድ መዳይን ጀርመን፡ ክምሰሉም ሰካን መዳይን ኮሎምቦስ ወአሃዮ ቅብለት አሜሪካ፡ ዒድ ሕርየት እብ ነያረት ክምሰል ዐየደዉ መምን አካናቱ ለበጽሐኒ ከበር አትአመረ።

ኤረትርየን ሰካን ኢማራት ዲብ መዲነት ዱብይ ዲብ ወደዉ እሕትፋል ጋምል ሰፊር ደውለት ኤረትርየ ዲብ ኢማራት አሰይድ ዑሰማን መሐመድ ዑመር፡ ዲብ ቀደመየ ከሊመት፡ 32ይ ዒድ ሕርየት ዝያደት ለፈንትዩ 30 ሰነት ናይለ ሸዐብ ኤረትርየ 99.8% “አይወ እግል ሕርየት” ለሰወተ እቱ ወመንዳራቱ ዲብ ዐለም ለሰቅለ እተ አምዕል ሰበት ጉብእ፡ አዜመ ክመ እት ማሌ እብ ፈዛዐት ስሙድነ ወመዳፈዐትነ እግል ነአደቅብ ትፋነ።

ርኢስ ጃልየት ኤረትርየን ዲብ ኢማራት አሰይድ ዑመር መሐመድ እብ ጀህቱ፡ ፍንቱት ዒድ ሕርየትነ ዐድነ ክምሰል ደውለት እንዴ ትነወረት እብ ክሉ መጃላት ዲብ ትጠወር ትመጽእ እተ ለህሌት መርሐለት ነዐይዱ ሰበት ህሊናቱ ቤለ።

እግል ገማል ዒድ ዲብ ጉብእ

ጅግራታት አምር ዓም፡ ርያደት፡ ክምሰልሁመ ዲብ ዐለዮ እንዴ ትወለደው ለዐበው ለትወቀለት ንቅጠት ለአምጸአው ኤረትርየን ሸባብ ናይ ፈሀም ወአትናያት ሸሃዳት ምን ሰፊር ወብዕዳም መስኡሊን ትከበተው።

ምን አስመረ ለመጽአት ፈናኔን ለብእተ ፍርቀት ዓዳት ህዬ እግል ዒድ ዝያደት ገማል ሀበቱ።

ሕድ እበ ሸብህ፡ 32^ይ ዒድ ሕርየት ኤረትርየ፡ ዲብ ኡጋንደ መዲነት ካምፓላ ዲብ ዮም 27 ማዮ ተዐየደ።

ሰፊር ደውለት ኤረትርየ ዲብ ኡጋንደ አሰይድ መሐመድ ሰሌማን አሕመድ ዲብ መክሰቲለ እሕትፋል ዲብ ቀደመየ ከሊመት፡ ናይ ዮም ዓመት ዒድ ሕርየት፡ ሸዐብ፡ ሕኩመት ወቅዋት ድፈዕ ኤረትርየ እግል አተብረኩት ወአድዐፎት እብ አባያም ለተሐበከ ስታቲባት እንዴ አፍሸለው፡ እግል አባያም ሸመት ከጃል እንዴ ገልበበው ዐውቱ ዳምቀት እንዴ ሰጀለው ዲብ መርሐለት ሐዳስ ዲብ ንትዐዴ እቱ ለህሌነ ወክድ ትትዐየድ ሀለዮተ ናይረት ወጋምለት ወድዩ።

ዲብ ፍረቅ ዓዳት ጃልየት፡ መትክል ወፍርቀት ዓዳት ኡጋንደ ለትነወረ ዒድ እብ ፍንቱይ እግል አጀኒት ፍቲ ወጠን ሰበት ለአሰብቀ፡ ሕሸመት መንዴረት ለለሐብር ወመርበይ ለለአጽብጥ በርምናምጅ ፋገዖት ጋምል ወዐለ።

ክምሰልሁመ 300 ሸባብ ለሻረከው እቱ እግል መደት ዎሮት ወሬሕ ለአተላለ ጅግረ ርያደት ክፋል ናይለ እሕትፋል ዐለ።

እምበል እሊ፡ ኤረትርየን ሰካን ሞንትርያል ከነዳመ፡ እግል 32ይ ዒድ ሕርየትነ እብ ሕበር እንዴ ወዐለው ናይ ዓዳት ወፋግዖት በርናምጅ እንዴ ነዘመው ዐየደዉ።

ኬትባይ፡ ደምሳሳ ጸጋይ

ሕርጊጎ፡ ምን መዲነት ባጽዕ ጀሀት ግብላት ሐድ 11 ኪሎሜትር ራይመት ለሀሌት ገዲመት ሸብህ መዲነት ተ። ለዐቢት ዓማት ጣቀት ከሀረባት ዐድነ ዲብ ሐረተ ሰበት ትትረከብ፤ እብ ስሜታ ተ ለትትአመር። ዘበን በዲር እብ ‘ደከኖ’ ትትአመር ዐለት። እብ ሳሆ ሐርማዝ በሀለት ተ። መናበረት ሸዐብ ሕርጊጎ እብ ዓመት እት ሐርሱ፤ ርዕዮ፡ ትጃረት ወጀለባት ዓሰ ትተንከብ። ለእብ ሐርሰ ልትናበር ዲብ ክምሰል ከረ ገደም ወፈረራ ላቱ አካናት ለሐርሱ። ለእብ ትጃረት መናበረቶም ለሳይሮ፡ ደካኪን ወገሃዊ እንዴ ወደው ልትናበር። ንዋይመ ለአዘብ። ለናይ ርዕዮ ህዬ እት መናበረት ሰብክ ወስግም ልተንከቦ። ሰርም ዲብ በሐር ዲብ ልትፈረር ዓሰ ዲብ ጀልቦ ወምሰሉ ለልጸበጥ ብዕድ ወራታት ሐያቶም ሳይሮ። ለተርፈው



ህዬ አስክ ባጽዕ ዲብ ልትፈረር ዲብ ለትፈናቱ መካትብ ሸቁ።

ሸዐብ ሕርጊጎ እብ ሰለሰ ቆምያት ለትከወና ተ። ትግሬ፡ ዐፈር ወሳሆ። ናይ አትራክ፡ ዐረብ ወሀንድ አስክ ለበን ዓይላትመ ብዝሓት ተን። ምናተ ልሰዕ ዮም ለሸዐብ እብ ህዳይ ውበዕድ መሕበራይ ዕላቃት ዲብ ሐድ ለተሓበራ ተ።

ዲብ ሕርጊጎ፡ ምን ወክድ እስትዕማር ትርክ እንዴ አንበተ ምን ሐምሰ ዐወሊ ለልትገለል ማይ ልትዐመር ለዐለ ጀራዲን እብ ብዝሐ ክምሰል ዐለ ልትሀደግ። ለምኑ ልትረከብ ፈርያት ወሐመሊት ህዬ እግል ሕርጊጎ እንዴ ከፈ አስክ ባጽዕ እንዴ ትለአክ ልትዘቤ ዐለ። እብ ጅላብ እንዴ ትጸወነ ህዬ ዲብለ መዲነት ለአቱ ዐለ። እሊ አውቶብሳት፡ ናይ ዐድ ኬክዩ ወሐረጎት እግል ሕርጊጎ ከደማት እግል ለሀብ እንዴ ኢለአነብት ለዐላ ተ።

አትራክ፡ እግል ባጽዕ ወድዋራተ እግል ለአትመቃረሐ ወካይሎም እንዴ ወደው ለሸየመም ናይባትመ ሰከኖም እት ሕርጊጎ ዐለ።

ውላድ ሕርጊጎ፡ ምንለ በዝሐ ስያሴይሮ ሐያት ወጠኖም ኢቁበው። ዶርም ዲብ ንዳል ሰኒ ዐቢቱ ለዐለ። እብ ፍንቱይ ለዲብለ በዐል ሱስት ላተ መድረሰት ሕርጊጎ ለደርሰው ሸባባት። ብዝሓም እብ ዲብ 1940ታት ወ1950ታት ለዐለ ስያሴይሮ ቴለል ሰበት ተአሰረው። አንፋር ሐረከት (መሕበር ሸውዐቱ) ለዐለው ውላድ ሕርጊጎ እብ ዕልብ ሐ-ዳም ይዐለው።

ግድለ ሰለሕ ክምሰል ተአንበታመ

ሕ ር ጊ ጎ (1^ይ ክፈል)

እግል ሰልፍ ወቅት እግል ሕርጊጎ፡ ባጽዕ ወድዋራተ እግል ትከምክም ዲብ ሰነት 1964 ለተአሰሰት ፈሬዕ ጀ.ተ.ኤ. መርከዝ ዲብ ሕርጊጎ ዐለ። ርኢሰ ናይለ ፈሬዕ መሕሙድ ሳልሕ ሰቤ (ሐሁ እግል ሸሂድ ዐ-ሰማን ሳልሕ ሰቤ) ዐለ። አግደ ሀደፋ፡ ሸባን እንዴ አፍዘዕክ እት ሚዳን ክምሰል ፈግሮ ውድዮት፡ ምስሉመ ዕንዳቁ፡ ሴፈ ወሰራይ አስክ ሚዳን ልኢክ ዐለ። ምናተ፡ ዲብ ሰነት 1966 ሀለዮተ እብ ዎሮ ጃሱስ ሰበት ተአመረ። ምነ 12 አንፋረ ለበዝሐው ዲብ እዴ አባይ ትከረው። አስክ 25 ሰነት ለገብእ ሐብስ ወጀዘ ህዬ ተሐከመ እቶም።

ለዐለት ሐረከት ንዳል ላኪን ሐቆ መትጸባጥ ናይ እሊ ፈሬዕመ ይአትካረመ። ግራሁ ረዩም እንዴ ኢትጸኔሕ ፈሬዕ ብዕድ ተአሰሰ።

ለልትዐዴ። ተድራብመ ምንገብእ አሰልፍ ዲብ ገደም ቱ ገብእ ለዐለ። ሐር ላኪን አስክ ዐገምቡሰ (ዴለተኖን) ተዐደ።

እሊ ክሉ ላኪን ምን ንዛም ሀይሌሰላሴ ሕቦዕ ይዐለ። ውላድለ ደዋዬሕ አግደ መአይደት ናይለ ንዳል ክምሰል ዐለው ክሉ ረኢሱ ቃዊሁ ይዐለ። ሰበት እሊ ሸዐብ ዐገምቡሰ ወገደም ምስል ንዋዩ እንዴ ትከምከመ እት ሕርጊጎ እግል ልሕደር ለቀሰብ መምርሕ ዲብ ሰነት 1970 አትሐላለፈ። አንሰ ለመምርሕ እግል ሐሸሞት ምስል ውላደት ሕርጊጎ አተዩ። ሰብ ህዬ ለበዝሐው አመት ሐርሰ ወርዕዮ እግል ሊደው መጅብ ይአተው። ለእንዴ ፈርሀው ምስል ንዋዩም ለአተው ሐ-ዳም ሰብ ህዬ፡ እብ እተ ወክድ ለሀይ ለዐለ ጀፋኛ ክሉ ንዋዩም እብ ሰፍረ ፈነ።

ዐሳክር ሀይለሰላሴ፡ ለፈግረ መምርሕ እግል ልሸቄ ክምሰል ኢቀድር ሰበት ትፈሀመዮ፡ ዲብለ ሰነት ለሀ ህግዩ ሐዳስ አምጸአ። “ውላድኩም ምነ ህለው እቱ አካናት አስክ ዐድ አቱዎም” ዲብ ልብሎ እጅትመግት እግል ሊደው አንበተው። ለእጅትመገ፡ በርሀት ጸሓይ እተ ትደቀብ እቱ ወክድ እንዴ ሐረውቶም ለወዱወ። ለወክድ ሸዐብ እብ ሀራራትለ ጸሓይ እግል ልትቀሌ አዝመው ምኑ። አሰልፍ ለእጅትመግት እግል ውላድ ተብዕን ሌጠ ለከሰስ ዐለ። ሐር ላኪን ተብዕት ወአንስ ለኢፈንቴ ገብአ። እብ ፍንቱይ ውላደም እት ሚዳን ለፈግረው ምኖም ዓይላት ተህዳድ ብዙሕ ወእስሮ ሳድፎም ዐለ። ብዝሓም ካምቦ ፖሊስ እትለ ትትብህል አካን ተአሰረው። እብ ሰብለ ጀሬ እቶም ለዐለት ጅርበት፡ አርወሐቶም ለሐግለውመ ወናይ ገርብ ወዐቅል ምስክነ ለሳደፈዮምመ ሐ-ዳም ይዐለው።

ዲብለ መደት ለሀ፡ ሻምበል ከበዴ ወሻምበል ረጋሰ ለልትብህሎ ማርሐት ‘ወሃጠጠ’ ለልትብህል ኖዕ ሰለሕ እብ ጸዕዩ ማጋት እንዴ ተ’ለው ለአቱ እት ህለው፡ ዲብ ሸዐብ ርዕብ ትሩድ ልትከለቅ ዐለ።

ቅዋት ሰውረት እብ ብሼሽ ዲብ መዳይን ገጸም እግል ልትጸገዮ ክምሰል አንበተው። ቅደደት ዐሳክር አባይ፡ “እለ ዐድ እግል ትደመር ቤ



” ለልብል እኩይ ሀደፍ ኤተነው። ዲብለ ዐድ ለዐለ መዐሳክር ወመራክዝ ፖሊስ ህዬ ምነ ዐድ ፋግር ዐለ። ዐድ እብ በይነ ክምሰል ተርፈት፡ ቤለ-ሮባታት ውበዕድ እት ታጅሮ ለልትጀሰሰ ጀዋሲስ ጠለቀው እተ።

* * *

ሰንበት ዐባይ 6 ኣፕሪል 1975፡ አሰይድ ኢብራሂም ደሬዕ ናይ ብክርም ሰዲድ ኢብራሂም ህዳይ ለትቃጸረው እተ አምዕል ዐለት። ቀደምለ አምዕል ለሀ ህዬ እግል ህዳይ ለገብእ ዜድ፡ ሸከር፡ ናዝ ውበዕድ እስትህላካት ምን ባጽዕ እግል ለአግረሆ ዐለ እሎም። ለብዳዕት እግል ህዳይተ ሚ ቀርድ ብዕድ አሰልፍ እብ መራቀብት ለወዱ ዐሳክር እግል ልትአከድ ዐለ እሎ። ህቶም ‘ይሕልፍ’ እግል ሊቦሉ ገብአው ምንገብእ ህዬ፡ ምን ኮሚሳርያቶ ወግቢ ተሰሬሕ እግል ለአፍገሮ እሉ ዐለ እሎም። ተሰሬሕ ሐቆ ፈግራመ ዲብ ገበይ ሕርጊጎ እብ ዐለት ንቅጠት ውበዕድ አካናት ተፍቲሽ (አጃፕ) ምን ሐዲስ ልትፈተሽ ዐለ። እብሊ ህዬ አሰይድ ኢብራሂም ሐቆ ናይ ክልኤ ሳምን አንጎጋይ እግል ዐፍሽ ዲብ ቤት አተዩ።

እተ ወክድ ለሀይ ወድ 15 ለዐለ ጃብር ወልዱ፡ እግል ሐሬ ለመጽአ ቴለል ልትዘከር እት ህለ።

ፈርወንተር አምዕል ህዳይ ክምሰል ገብአት፡ ምነ ትፈናተ ድዋራት ለመጽአው ብዝሓም ጋሽ ዲብ ቤትነ ተአከበው። እት ፍንጌሆም ምን ገደም ወዐገምቡሰ ለመጽአው ሐልዮት ወመተልሀየት ሸባባት ዐለው። ለሸባባት ምርግዳ እግል ልተልሀው እት ልትከማከሞ ላኪን አቡዬ፡ “አነ ለሓለት ተመመኢኒ ይህሌት፡ እሎም ውላጄ አነ እለ መናሰበቼ እብ ሰላም እግል ትሕለፍ እዬቱ ሐዘ ለህሌኩ፡ ዐይብኩም ከበሮ ኢትዝበጦ፡ እንዴ ደረርኩም ሌጠ ሰከቦ። ፈንጎሕ አመት ህዳይነ ኒዴ” ቤለዮም።

ለሸባባት እብ ህግዩ ይአግነዐው። እግል ልደዩፍ ምን ረዩም ለመጽአው ዐለው። ህግዩ ዐቢ እግል ለሐሸሞ ሰበት ሐዘው ላኪን እተ ዶሎም ዎሮ በርናምጅ አፍገረው። ህቱ ህዬ፡ አሰልፍ እግል ልደረሮ ወሐር ዲብ ባካት ዐድ መርዓዊ ዲብለ ዐለ ሕለል

እንዴ ሰክበው እግል ልትመዋው፡ ሐቆሁ መጋውሕ እንዴ ቀንጸው አስክ ዐድ መርዓዊ እንዴ አቅበለው ወመብሩክ እንዴ ቤለው አስክ ዐድ መርዓት እግል ሊጊሶ ወምኑ አስክ ዐዶም እግል ለአቅብሎ ዐለ።

ለወክድ፡ ዐሳክር አቶብዩ ምን ሳዐት 9፡00 ላሊ እንዴ አንበተው እብ ጀሀት ቅብለት ሕርጊጎ እንዴ ገብአው አስክ በሐር ለህለ አካናት ጸብጣሙ ትመዋው።

ለሸባባት፡ ክምሰል ደረረው፡ እብ ጀሀት ቅብለት ሕርጊጎ እተ ህለ ሕለል ገጸም ሄረረው። ዲብ ሕለል ክሪ እግል ሊቦሎ ወዘብጥ እግል ልትከበቶም ሐቱ ገብአ። ዲብለ ወክድ ለሀይ “ወንበዴታት ዲብ ሕርጊጎ እንዴ አተው ልደረሮ ወምን ገጽ ላሊ ፈግሮ ህለው” ለልብል ከበር እግል ዐሳክር አባይ ባጽሐም ሰበት ዐለ። ጀብሀት መጸአተነ እንዴ ቤለውቶም ዘብጥ ለከሰተው።

ዘብጥ ክምሰል አንበተ፡ ሓምድ



ሐጃ አቡበከር፡ “በጥ በሎ! በጥ በሎ!” ቤለዮም እግል መልሂቲ። ዐሳክር አባይ ላኪን በክት ይሀበዎም፡ ለአርበዕ እተ ዶሎም ድራር ርሳስ አባይ ገብአው። ሓምድ ህዬ ዶል ዲብ ልሽሕግ ወዶልመ ዲብ ልትባለስ እንዴ ሀርብ ፈግረ።

ሓምድ ሐጃ አቡበከር ክምሰል ሀርብ አስክ ዐድ ሕጻን ይአቅበሉ። እንዴ ደንገጸ እባሁ ሸንከት ግብለት አተላለ። ዐድ ወለት ክምሰል በጽሐ፡ “አምሐረ መጽአት ህረዐ! ህረዐ!” ቤለ። ሸዐብ ህዬ ጀሀት ግብለት ገጹ እግል ልህረብ አንበተ። ለዐሳክር ምን አዋራፍለ ሕለል እንዴ አንበተው አስክ ተሐት ዘብጥ ድቁብ ለአተላሉ ዐለው።

ልተላሌ. . .



ሰሐፊ፡ ዮሴፍ ሀይሌማርያም

መድረሰት ህግደ ወዳዳት ቻይን (ኮፊሽየስ ኢንስቲትዩት) እተሐልፈ ወሬሕ ማየ እብ መናሰበት እድንያይት አምዕል ህግደ ቻይን፡ እትጃምዐት አስመረ ዲበ ህሌት ቃዕት፡ ጅግረ ርያደት ታይጂ ዋድየት ዐለት። እተ መናሰበት ህይ፡ ደረሰ፡ ዕዱማም ጋሽ፡ ዋልዴን ናይለ መትጃግረት፡ ዲብ ኤረትርየ ለህለው ሲንዩን፡ ክምሰልሁ መ ሰፊር ጅምሁርየት ሽዑብ ቻይን እት ኤረትርየ ሚስተር



ሰፊር ዳይግ



ደክተር ሀብታሚ ሚንግሬይ



መም. ዲቪያን ጸንግ



መም. ዮናታን አንገሰም



ደረሳይት እብትሳም መሐመድ

ህግደ ወዳዳት፡ ሰሐፊ ጠወፎት-ዕላቁት-ወጅንሰየት

ጳይ ግ ሓድራም ዐለው።

ለእብ ብሕቶት ወመጃሚዕ ለትጃግረው ደረሰ፡ እተ መድረሰት እንዴ ደርሰ ዮመቱ ክም መደርሰ እንዴ ገብአ ሸቄ ለህለ ኤርትራ መደርሰ ታይጂ ለመርሐየም እት ገብአ፡ እግለ እብ ለቡብሰ መጅተመዕ ቻይን ወክራቱ ለአርአዉ ዕፌ፡ እብ በቃዕት ታመት ቶም ለቀደመዉ። ሐቆለ ናይ ክልኤ ሳዐት ዕፌ ህይ፡ እብ መጃሚዕ ወአፍራድ ለትዐውተው ሸሃዳት ተህየበዮም።

እተ መናሰበት ሰፊር ኤረትርየ ዲብ ቻይን ሚስተር ጳይ ግ ለምዕል ወለጅግረ እበ ክስሰ ዲበ አስመዐዩ ክሊመት፡ ፍንጌ ኤረትርየ ወቻይን እብ ኩሉ ጀዋንበ ዲብ ትጠወር ትመጽእ ለህሌት ዕላቁት እት ለሐምድ፡ እሊ ሕሹም ዒዶም ምሰል ሽዑብ ኤረትርየ ምን ዐዩደዉ ሐበን ወዐጅብ ክም ሀበዮም ሸርሐ። ሰፊር ጳይ ግ እንዴ አትሉ፡ ዮም ዓመት 20 አፕሪል -እድያይት አምዕል ህግደ ቻይን፡ እግል 14ይ ኢነት ትትዐዩድ ክም ህሌት፡ እሊ ህይ እግል ሽዑብ ቻይን ወክሉም መትሃግየትለ ህግደ ዛይድ ሐበን ክም ቱ አክደ። “ህግደ ቻይን እት ፍንጌ ሰልጠናት መፋህመት ተአዘደድ” ሐንቲለ ትብል ሰቅራት ትትዐዩድ ለህሌት ናይ ዮም ዓመት እድንያይት አምዕል ሂገ ቻይን፡ እሊ ህይ እግል ዝያድ ሰስ አልፍ ሰነት ዕምር ለበ ህግደ ቻይን ሕሸመት ወዐቦት ለልአለብስ ቱ ቤሉ።

“ህግደ ቻይን፡ ሐቱ ምን ሰስ ረስምያት ሀገጊት መጅልስ ቅራን ጋብአት ህሌት። አስክ እለ ህይ፡ 180 ድወል ወአቃሊም፡ ህግደ ቻይን እት ገዛም ድራሰተን ኡትያተ ህለዮ። እብሊ ህይ ዐደድለ ምን ደውለት ቻይን በረ ህግደ ቻይን ደርሰ ለህለው አንፋር 30 ሚልዮን ባዴሕ ህለ” ለቤለ ሰፊር ጳይ ግ፡ ዐደድለ ህግደ ቻይን ለአመረው ክምን ደውለት ቻይን በረ ልትነፍያ እበ ለህለው መዋዋኒን ድወል ብዕድ ህይ ዝያድ 200 ሚልዮን ባዴሕ ክም ህለ አብረህ።

እብ ክሰሰለ መናሰበት ምን አትሃንፍሆም ደረሰ ወመደርሰን ሰልፍ ክም መደርሰ ህግደ ወዳዳት ቻይን ዲብ ኤረትርየ እንዴ ገብአ አርበዕ ሰነት ለሸቀ ዲቪድ ሊዩ ቱ። ህቱ፡ ኤረትርየን ደረሰ ህግደ ወዳዳት ቻይን፡ እብ ኩሉ ቅድራቶም ፈዳብያም ወባሰርት ለፈቱ ሰበት ቶም፡ እበ ቀዱሙ ጅግራታት ክል ዶል ጋኔዕ ክም ቱ ወደሐ። መብዝሐም ደረሳሁ ህይ ህግደ ቻይን እግል ልምለኮ ወልትፋህዋ እብ፡ እግል ልሕለው ወልሰሰዮ እበ ቀዲርም፡ ክምሰልሁመ ርያደት ታይጂ መሊኮም፡ ተአምርተ ናይለ ገብእ ለህለ ካድም ክም ቱ አፍሀመ።

እብሊ ዮም ዓመት ቅዱማሙ ለህለው ዕፌ ፋሬሕ ክም ቱ፡ ዲብ መብተቅበል ህይ ኤረትርየ ለወክሎ ብዝሓም መውሀበት ለዐም ደረሰ ፋርያም ሰበት ህለው፡ ሰሚት ዐዶም ወርሐም ክም ለአሰሙ ዳምን ክም ቱ ወለምህነት እግል ለአተላልወ መክረ።



እሊ መሰል ጅግረ ህይ፡ ዕላቁት ወመፋህማት ኤረትርየ ወቻይን እግል ልትጠወር ሰበት ሰዴ፡ እብ ለሐሰት እግል ለአተላላ ትፋኒ።

ዮናታን አንገሰም፡ እት መድረሰት ዓዳት ወህግደ ቻይን እት እብ ክሰሰ ታይጂ፡ ኮንዶ ወክንፋ ሰስ ሰነት እንዴ ደርሰ፡ አዜ ዲብ መድረሰት ኮንፊሸየስ አስመረ ክም መደርሰ እንዴ ገብአ እግል ብዕዳም ኤረትርየን ሐዉ ለአደርሰ ህለ። መምህር ዮናታን፡ እግል ሰለሰ ሰነት ለአድረሰዮም ዝያድ 60 ደረሳሁ እት ለትፈናተ ደረጃት እብጸሕ ህለ። “ ታይጂ፡ ኮንዶ ወክንፋ ሲንዩን ለወድዉ ለሐሰ ሐረካት ርያደት ቱ። አግደ ህይ አደብ ሰኒ ክም ለህሌ እግልክ ሰበት ወዴ፡ ዓፍየት ርሕክ ወሸዑብክ እት ወቀሎት ለሰዴ፡ ክምሰልሁመ ምሰል ውላድ አዳም ክም ትትፋቱ ወትሸቄ በክት ለትፈቱ ርያደት ዓዳቶም ቱ” እት ልብል፡ ኤረትርየን ደረሳሁ ምን ሰእየቱ ወለዐል በቃዕት ክም አርአው ወደሐ።

ደረሳይ 10ይ ፊሰል መድረሰት በርከ መሐመድ ዐብዱ መሐመድ፡ እብ ብሕቶቱ አወላይ፡ እብ መጅመዐት ህይ ካልኣይ ለፈግራ ቱ። ክልኤ ሰነት መምህር ዮናታን ክም አድረሰዩ ለሐበረ ደርሳይ መሐመድ፡ መተልህያይ ካልኣይ ዲቪዝዮን ፈሪቅ ሾሊዶል ሕውነት ሰበት ህለ፡ ታይጂ እት ኩረት ሾሊዶል ጀላብ እግል ትሰደዩ ደርሰ ክም ህለ ወክም ለአተላልየ ሐበረ።

ደረሳይት 11ይ ፊሰል መድረሰት ሰምበል ደሊና ዳዊትመ፡ እት ናይ መጅመዐት ጅግረ አወላይት ፈግረት። ሐረካት ርያደት-ታይጂ እግል መደት ሰነት ወሰር ለደርሰት ደሊና፡ “ታይጂ ዓፍየት እንዴ ርክብክ ምን ርሕክ ክም ትዳፊዕ ለትወዴ፡ እብ ፍንቱይ አዋልድ ዒዳተን ምን መትከርከር ለትአነግፍ፡ ሸክል ገርበን ለትአሰኔ ርያደት ቱ” ትብል መንፈዕት ታይጂ እት ሸፊሕ። ዋልዴን ዲብ እለ ድራሰት ታይጂ ሰበት ሰጅዕወ ህይ ክም ተአተላልየ አክደት።

ደረሳይት 9ይ ፊሰል መድረሰት በሐር ቀየሕ ለህሌት እተ ጅግረ መጅመዐት ካልኣይት ለፈግረት ሳሌም ሚክኤል፡ ታይጂ እግል ሰነት ደርሰት። እለ ርያደት ቻይን፡ ሐንገለ እንዴ ሐደሰት እለ እት ኩሉ አሸቃለ ዕጽም ክም ወዴተ ወደሐት።

ዲቪያን ጸንግ፡ መደርሰት ህግደ ወዳዳት ቻይን ዲብ ኤረትርየ ቱ። ህተ ምን ሰነት 2016 አስክ 2018 እንሰር እንዴ አድረሰት ዐደ ጋይሰት ክም ዐለት እት ሸፊሕ፡ አዜ እት ኤረትርየ ካልእ ዶል እንዴ አቅበለት ተአደርሰ ለህሌት ቱ። ህተ ለአድረሰቶም ኤረትርየን ደረሰ፡ ዮመቱ ክም መደርሰን ህግደ ወዳዳት ቻይን ጋብኣም ዶል ረኡቶም፡ ደሚረ ሰኒ ክም ትረይሐ ተሐብር። ኤረትርየ ወቻይን እሊ መጃል እት ዕላቃተን፡

ደረሰ እት ምልክት ህግደ ወዳዳት ቻይን፡ ክምሰልሁመ ርያደት ዓዳት ታይጂ እርኡያመ ለህለው በቃዕት፡ ተአምርተ ናይለ ፍንጌ ክልኤተን ሐዋት ድወል ኤረትርየ ወቻይን ገብእ ለህለ መትባዳል ዐዋዲ ሰበት ቱ። እት መብተቅበል ዝያድ ክም ለአደቁቡ አክደ።

እብትሳም መሐመድ፡ ሐቱ ምን መድረሰት ዓዳት ወህግደ ቻይን እት ኤረትርየ (ኮንፊሸየስ) ለአፍሬቶም ደረሳ ቱ። ህተ ህግደ ቻይን እንዴ ደርሰት 5ይት ደረጃት እት ዕዲት ህሌት። ምን HSK1-SHK-4 ህይ ደርሰት። እት ክታበት ህግደ ቻይን (ካሊግራፊ) ህይ ለሐሰት ግርመት ክታበት ለበ ክም ተ አትአመረት። እትሊ ናይ 10 ሰነት ሄራራ፡ ዓዳት ወህግደ ቻይን እንዴ መልከት።



አሸቃል ዐማረን፡ መትማሳለን ወሄራረን ለሰድዮን መጃል ሰበት ቱ። ዝያደት እግል ለአደቅባሁ ትትፋኒ። ለጅግረ ህይ ኤረትርየን ደረሰ መቅደረቶም ወበቃዕቶም ለአርአው ዲብ ለሐሰ ዕፌ ክም ዐለ አክደት።

መዲር መድረሰት ኮንፊሸየስ እት ኤረትርየ ዶክተር ሀብታሚ ሚንግሬይ፡ እበ ጅግረ ርያሕ ክምቱ፡ እሊ እብ መናሰበት እድንያይት አምዕል ህግደ ቻይን ለገብአ ጅግረ ህይ፡ መቅደረት ወበቃዕት ኤረትርየን ደረሰ እግል አትናያት ወአደቃብ ለሀደፋ ክም ቱ አፍሀመ። እሊ

ምሰል ሲንዩን እምበል ምሸክለት እግል ትትፋህም ቃድረት ህሌት። እምበልሁመ እብ እቅትሳድ ረሐ ወዋልዴን እግል ትሰዴ ክም ሰደየ ወደሐት እግል።

ህግደ ቻይን ህይ እትለ መደት ጎኑ፡ ዲብ አፍሪቀ ወድወል ብዕድ ብዝሓም መትሃግየት ትረክብ ወዲብ ዕላቃት ናይለ ድወል ዶር ውቁል ትተልፂ ለህሌት፡ እድንያይት ህግደ እግል ትግበእመ እት አስሐብብ ገጸ ትገይስ ለህሌት ቱ። ህግደ ቻይን ዮም ዲብ ቀበት ዐደ ዝያድ 1.5 ቢልዮን መትሃግየት ህለው እግል።



(1^ይ ክፈል)

ኬትባይ፡ ሚካኤል በርሀ

ቦጦኬኒ ሽብሐፊ - ሽገረ

አንፋርላ ቦጦኬኒ፡ ክሉ መክሉቅ እት ሃድእ አጃወእ ዐለ። ለላሊ - ዲብ 18 ዲሰምበር ለጸብሐት ላሊ ሓቅፈቱ

ሰነት 1986 እንዴት ትባላለች ሰነት 1987 ጠበሽ ትቤ። ጀብህት ነቅፈ አክም በዲረ። ጨበል ሞሻት ክምሰለ በዝሐ እቱ ራምሽ ገሀር ጭቡሊ ትቤ። ዲብ ዐሰር ሰነተ። ምስል ደብር ወመሓዝ ሳሕል ዲብ ልዳሽ እብር ለሀንጦጦለ እተ መስለት። ለኢደግልል ንእሽ ወለኢበርድ ሞጅ አለቡ። ምስል ክሉ ምክሐሁ ህዩ 'ናደው እዝ' ዓጽቱ እግል ትትከርከር አንበተት። እግል መደት ሰዕ ሰነት ቱ ምን ቅያስ ወለዐል ተዐዳወነ። ጀብህት ሽዕብየት ህዩ ለእስትሽሃድ ቃሊ እንዴ ደፍዐት ህያይ ለአበለ ቅወት። እንዴ ትገሴት ወአስተረሐት ጌመመተ። እብ ቃትን ሐርብ። ዲብ ደረጀት መሳወየት (ጃልነት) ክምሰል ኦቲት አከደት። መሳወየት ለአፍ-ዲብ አፍ ጋንሓት ለህለየ ጀንገዴዳታት ምን እብ ክለ ሐለቱ ረአስ ምስማሩ ዘብጠ ትቀርረ። አክል ሕድ ቅወት ተ። ሐቀሁ ለተወወተ እዴ ዛይደት ሰበት ጸብዋ ለሐዘየ እግል ሊዴ ቅድረት ቡ።

ቃእድ ክፈል ጃሽ 16 ሙናድል ዐመር ጠዊል፡ እግል ቃእድ ቦጦኬኒ ሓይልኣብ ተሰፋይ፡ “ምር ወቀይ እግል ንሸቁቱ። ለመስኦልየት ህዩ እግል ክፈል ዴሽነ ህይብት ህሉት። ምኑ ዲቡ ህዩ እብ ቦጦኬኒ ለትሰርገል ናይ ተሰልል ዐመልየት ሰበት ህሉት። አክል ሕድ ክምሰለ ቀደም እለ (1985) ለወዴኩሙ ውሕደትክ እንዴ ጸበዋክ ዲብ ከርስ መርከዝ አማውር አባይ እግል ትእቱ ዳሌ! እሊ ሽቅል እሊ ትሰርገል ምንገብእ ታሪካይት አህምየቱ ዐባይተ። መታክል ሳደፈዩ ምንገብእ ህዩ ቦጦኬኒ እግል እስትሽሃድ እግል ትትሰበልቱ። ምኑ ለነጃ ሙናድል እግል ለህሌ ኢኮን።” ለልብል መምሬሕ ሀቤ፡ ሓይልኣብ እለ ክምሰል ሰምዐ እብ ልቡ እበ ሰልፍ ናይ ዐውቲ ደሚር ሌጠ እግል ልሽቄ ክምሰል ቡ አርወሐቱ አትአመ። ከንፈሩ እንዴ ነክሽ ህዩ እግል መደቲት ሐሰቤ፡ “አምኣት ሐጺን ለመጭር ሽባን እንዴ ጸበዋኩ፡ እስው መታክልቱ ለከረዐኒ!” ዲብ ልብል እት ርሐ ሰኣል እበ መስል ፍክር በልሰ እለ። ለወክድ ምን ጭፍሩ አስክ ጭገር ረአሱ፡ ለቀንጨበ ሴል ገርቡ እንዴ ኢተርፍ፡ እብ ናይ ዐውቲ ደሚር ትፈሰስ። መዋ-መጦሩ ላኪን ለዲብ ኮሚንታንግ ቀደም ሰኒን ለገብእ ሐርብ መሪር ትቅብ ቤለ እቱ። ለምን ደብር ደንደን እንክር ደገለብ

ክምሰል ሰልሰለት ለትመደደው አድብር ዐባዩ ዲብ ቀደም ዕንታቱ ትካየለው እለ። ምንተሐት እንዴ አንቀዕረርክ ትርእየም እት ህሌክ ምን ምድር ዲብ ሰመ ለቀርቦቶም ለመሰሎ። እግል እሊ አድብር እሊ ነዳይትክ እንዴ ሀብክ እግል አፍ ልቡ ለሀቤክ ደብር ኮሚንታንግ አቅመትክ ምንገብእመ ዲብ ቀሪ ሰሙይ ክምሰለ አቲክ ንየትክ ለለሓጭር ቱ። ኮሚንታንግ ምን ልውሕድ 1300 ምትር መትወቃል ዲብ ቀበት ከዋ አባይ ለህሌ፡ ዲብ ርሽመቱ ደባባት ለዐለ እቱ ትሩድ ድፈዕ አባይ ቱ።

ቦጦኬኒ እብ ከማሌ፡ ሳልፋይ ከዋ ሐርብ እንዴ ኢትትረኡ እንዴ ሐልፈት፡ ደባባት ወክቡድ ሰለሕ ዲብል ትዋተደ እቱ ዲብ ከርስ ከዋ አባይ ለህለ ውቁል ደብር እግል ትፍገር ገብኣት ምንገብእ፡ ክምሰል ሰንደዊት እንዴ ጨፍለቀት እግል ኢትትረፍ፡ ለልጠለብ ምን ጅህድ ወመደጋግ ቅያሱ ወቀሪናሁ እግል ትጌምሙ ኢለሐይል። አሮ ሙሰለሰ አዋልድ ለብእቶም 300 ምሕርበት መንደሊታት እት ብቅት ለካሬ ቴለል እግል ልትከለቅ ለህለ በክት ምን ቅያስ ወለዐል ዐቢቱ። ኢኮን አክል እሊ ላቶም ሙናድሊን፡ ሐቲመ ምንገብእ ብላሽ ለተሐልፍ አርወሐት ምሕርባይ እግል ተህሌ ኢልትሐዜ እብ ዓዓት ሐርብ ጀብህት ሽዕብየት።

ሓይልኣብ፡ ለሐቲ ዕንቱ ኩሉ ረአስ ይህሉት። ዲብል ሐልፈ ሕሩባት ሰበለየ። ግብ ዲብ ትመስልተ ለተርፈት። አሮ ምን እብ ዕምር ለነአሸው ዲብ ሰነት 1974 እት ሰውረት ለፈግረው ሙናድሊን ቱ። ለተሀየቡቱ መስኦልየት ቀላል ሰበት ይዐለት፡ አውለውየት ለለሀይቡ ጋር ተድራብ ቱ ለዐለ። ምን ነቅፈ እንዴ ትብገስ ሐጃፈት አስክ በጽሕ፡ ዲብ ሕሳቡ ቦጦኬኒ እብ ከማሊ ዲብ ፈዳብ ተድራብ ለተኣቱ እቱ ይማም ቱ ለአፈግር ለዐለ።

ሽሂድ ቃእድ ፈሰለት ገብረሂወት ተኽሌ፡ ጅሩብ ሙደርብ ቱ ለዐለ። እብሊ ህዩ ሓይልኣብ፡ እግል ገብረሂወት ምን ድፈዕ እንዴ ከረዩ፡ እግል ትሰፈራትን ፈሳይል ናይለ ቦጦኬኒ፡ እብ ተርተረት እግል ልደርበን ሐበረዩ። ሓይልኣብ እግል ገብረሂወት ተኽሌ እብ አሳሰለ ሀበዩ መምርሕ ረሐት እገር ናይ ክል ነፈር ቦጦኬኒ፡ አፍ ሾከት ዐቅበ እንዴ ኬደ፡ አስክ ሰብር እግል ልትለቤ ቡ።

ዲብ ደርዕ እግል ልትበደል! አንፋር ቦጦኬኒ እበ ልትሀየቦም ለዐለ ተድራብ እግል አሮ ድቁብ ወቀይ ልዳለው ክምሰል ህለው ሽክ ኢወደው። ዲብ አየ አካን? ምዶል? እብ ከአፎ? ላኪን እብ ተፋሰል ለለአሙሩ ዐለ አለቡ። ምኖም ለደሀሪ ሽእ ጽዋሮም አክል ወዲቅ እብረትመ ለገብእ ክርን ክምሰል ኢወዴ እግል ልትሳደድ ክምሰል ቡ ተሐበረው። እበ ፈግረ በርናምጅ ህዩ፡ ለቦጦኬኒ እብ ለትፈናተ ደረጃት እግል አውረሐት ለአተላለ ተድራብ ዐስከሪ ወዴት።

‘አምዕል ወክልብ እንዴ ኢትትላክዮም መጸኦ’ ክምሰለ ልትበህል 1987 እግል ትሳረሐ ናይ ደንገበ ወርሐ እስትንቡረት ትቤ።

ለዐመልየት ሀደፈ እግል ክሎም ለከሰሶም መስኦሊን ናይለ እተ ጀብህት ለዐለየ ምሕርበት ወሕዳት ክፈል ጃሽ፡ ረሰሚ ትሽረሐ። ሀደፍ ናይለ በገስ ላኪን ለላሊ ወአምዕል ትትገሐል ለዐለት ውሕደት፡ ጀብህት እግል ፈተሾት ዲኢኮን በክት ትረከበ እንዴ ትቤ አስክ መዳይን አፍዐበት ወከረን አሴራር ክምሰል ኢኮን ተሐበረዩ።

ለምን ዝላም አውረሐት ሰቦዕ



ተለክ ቤለየ። ለክሉ ሽእ እንዴ ከብደ እቶም ክሉ ረአሱ ለኢጌመመው ወለኢለአሙሩ አምዕል ወሽቅል ልታከው ለዐለው ምሕርበት ህዩ፡ መምነ ሻፋም እቱ ለዐለው ጽልሙት አልቁብ ወዐነክል እግል ልምጸኦ ክምሰል አምበተው፡ ገርቦም ዝያደት ዲብ ልትፋሰስ እሎም ተወሰም ቤለው። እግል ኖስኖሶም ቱ ሕድ ለልርኡ። ምን ልትበገሶ እንዴ አንበተው ዲብል ተኣከበው እተ ዕጩት እንዴ በጽሐው ክምሰል አከለት ክብብ አስክ ልብሎ፡ ለጽልሙት ድዋራት፡ ወለ አሮ ነፈር ለህለ እቱ መስል ይዐለ።

ለወክድ ክልኦት ኣብጸሐት ሙናድሊን ምስል ቃእድ ቦጦኬኒ



ወሰማን ለልደቀብ ለኩፍ ሐጸይን እንዴ በርደ፡ ዲብ ሰሩመ እግለ ሸበህ ሀዳኦት ለአግረስ ሰራይር ወነኣይሸ ሔዋን ከደን ከሰኩሰ ዲብ ልብል ልትረኡ ዐለ። ህቶም ለልብ ከረው እለ ሸበህ መስኩበት ዳይመት እግል ትግበእ እሎም ወለ እበ ደሀሪ ቃነ ምንማቱ። እብ ጨቅ-ጭሪቀም ወንቃዮም ሰንቀዮም ወጣቅዲቶም እግል ለአስመዶ እምቡታም ዐለው። ናይ አስል አካናቶም እንዴ ሐደገው ዲብል ልትወጤ እሎም ናይ መንገፎ አካናት ሱጉማም ዐለው። አሮት ደርብ አሮት ዲብ ተሌ ላኪን አስክለ እሙር መስከሶም እብ ብሼሾም ለአቀብሎ ዐለው። ፈሪር ወገብገቦት ደብር ናይለ ሰራይር ላኪን፡ ድህር ሃድእ ወራውግ ቱ ለዐለ። አዋይን እዲናሆም ክም በዲሩ ለአቅበለ መስል እቶም ዐለ። ለብሩድ ሽማላት ድዋራት ነቅፈ እንዴ ኢተርፍ፡ ምን ሐጺን ወባሮት ጼኔ ለዐለ ለኢጠቢዲ ጼኔ፡ እብ ብሼሹ ልትወረዕ ክምሰል ዐለ ለኢደለ መክሉቅ ዐለ እግል ልትበህል ኢቀድር - 1987።

ዲብ ክእነ ክቡድ ደቃይቅ፡ ክሉ ፈሳይል ናይለ ቦጦኬኒ ዲብ ሕግስ ሐቲ ዕጩት ዐባይ እግል ልጀመዐ

ለህሌት ናይ ከርስ ቃቀት ተፍጂር እምበለ አንፋረ ቦጦኬኒ ወቅያደት ናይለ ጀብህት ብዕድ ለአምሩ ዐለ አለቡ።

አንፋርላ ቦጦኬኒ፡ አባይ ክቡድ ስልሐ ዲብል ተክለ እቱ ሳብት መርከዙ፡ መስኦሊን ዲብ ለገብኣት ተበት ኮሚንታንግ ቶም እግል ልዕረት፡ መጋይስ ዲብ ሃድእ አውካድ ለትገይሱ ልሙድ ግያስ እንዴ ኢገብእ፡ ዲብ ትደገግ ወትንፋሰክ ዲብ ተሐብዕ ለትፈግሩቱ ለዐለ። እተ መደት ለህ ምን ለምደው ወኪን ሐቲ ሓጀት ሐዳስ እግል ሊደውቱ። ሽዳሆም እንዴ ሐርጠው እግል አወላይ ከዋ ሐርብ እግል ልሕለፎ፡ ኢኮን ለሰክበ ዐስከራ፡ ላሊ ለትጸብሕ እሎም ሔዋናት ከደንመ ፍላም ክርን እግል ልሰመዶ አለቦም። “ክርን ትሰመዐት ምንገብእ ለቲለል ክሉ ረአሱ እግል ልትበደል ቱ። ለዐመልየት ክብደት ወረደም ወክድ ለትጠልብ ሳፍየት ድራሰት ለገብኣት እሳተ። እግል ዐመልየት እንዴ አትመመው ምን ታብ ኮሚንታንግ አስክ ሕሊል ሕዳይ ዶል ለአድሮሩ ላኪን ለትመቃረሐ ብዕድ ዐመልየት እግል ልስነዶምቱ።”

“እብ ዐውቲ ሌጠ ወቀይነ እንዴ አትመምነ ዲብል ሕሊል ንትከፈ። ሐቀሁ ተአፈርህ አለቡ!” ቤለ እብ ልቡ፡ ለመስኦልየት ዐባይ ራፍዕ ለዐለ ቃእድ ቦጦኬኒ፡ እብ ዐቢታይክ ህዋየ አለቡ። ሰበቡ ክርን ላሊ ገያሲት ሰበት ተ። ለቦጦኬኒ ዲብ ሕግስ ድፍዓት አባይ እንዴ ገብኣት፡ ኢኮን ሂጋ፡ አተንፈሶትመ እብ መደጋግ እግል ልግበእ ዐለ እለ። ምርወት ወሙናድል ለኢልትፈናተው አግጸት ቶም። ሰበት እሊ ዲብል አካናቶም እት እንቶም ፈርሐቶም ሸርሐው። “እግልሚ ሽዳነ ነሐርዋ” ለቤለው ሐዳም ላኪን እት ቀብቶም ዐለው። ለሹዑሮም ምን ቅብብ እት ረአስ አባይ ወድቁብ ዐሽም ሐርብ ለልትበገስ ሰበት ገብኦ እብ ቀሊል ክምሰል ልትህወን ገብኦ። “አናመ ምስልኩም ሽዳይ እንዴ ሐረጥኮ እግል ኢጊሱቱ” ቤለዮም ሓይልኣብ ለቃእድ ቦጦኬኒ፡ ለዲብ ዘበን ንዳል፡ መስኦል ቀደም ውሕደቱ ክምሰል ለሐልፍ ለለአምሮ አንፋሩ እምበል መትገራጋም እባሆም ፍርግልጽ ቤለው - እግል እስትሽሃድ!

ልተላሌ . . . ዔማት፡ ክታብ ናደው



ዝያረት ርኢስ ኢሰያስ አፍወርቂ ዲብ ፈደራሽን ሩሲያ

ሰሐፊ፡ ዳወሉስ ነታባይ
ሰወር፡ ታኦዝ አብርሃም

ኦፕታት 30 ማየ 2023፡ ርኢስ ኢሰያስ አፍወርቂ እብ ዐዙመት ርኢስ ቸላድሚር ፑቲን እት ፈደራልያይት ደውለት ሩሲያ ዝያረት ረስምየት እግል ሊዴ ለትበገስ እት አምዕልተ። ርኢስ ኢሰያስ አፍወርቂ፡ ወምሰሉ ለጌስ ወዘር ካርጅየት አሰይድ ዑስማን ሳልሕ ወመፈወድ መፈውድየት ዓዳት ወርያደት ሰፊር ዘመዴ ተክሌ ለልትረከብ እቱ ውቁል ወፍድ ኤረትርየ ለረፍዐት ጣኢረት፡ ምን መጣር አስመረ ትትበገስ እት ህሌት አክል አድሕድ ሰዓት 7:00 አስቦሕ ዐለ። ለጥያረት ዲብ ዐስተር አስመረ ምለዐል ግዩም እንዴ ተዐርፊት፡ መትወቃለ ወእትጅህ ክም ወጤት፡ እግለ ሐድ 5,600 ኪሎ ምትር ናይ ጀው ሪም ለበ መሳፈት አስመረ-ሞስኮ እግል ትብተክ ሰተተት። ዐስተር ሕዱድ ድወል ወአብሐሩ፡ አድብር ወመሓዛት እት ትጫርም ህዩ ሰኒ ወአማን ትፈተተት።

ሐቆ ናይ 6 ሳዐት ወሰር ሄራር ዱቅራ፡ ርኢስ ኢሰያስ ወምሰሉ ሱፋር ለዐለ ውቁል ወፍድ ኤረትርየ፡ ቃልያም ጋሽ ሕሽመት ለልትከበት እድንያይ መጣር ቸኸሽ-2 ዲበ አተው ዲበ ኢት፡ ናይብ ወዘር ሕስር ካርጅየት ሚስተር ሩዴንኮ አንድሬ፡ እብ ናይ ሕሽመት ሰላም ወአሴራር ትከበተዮም። ወጠንያይ አናሺድ ኤረትርየ ወፈደራሽን ሩሲያ ህዩ ትነሽደ።

ዝያረት ርኢስ ኢሰያስ ህዩ፡ አርቦዕ 31 ማየ ረስሚ ተአነብት። ሳዐት 11:00 አዳውሕየት ዲብ ባካት ቀሰር ሕኩመት ክፈምሊን እት ለህሌት ሐዲቀት ‘አሌክሳንደር ጋርደን’ እበ ለገብአት ዓደት ክርየት ዕንቦበ ዲብ “ተምሳል ፍራስ” አስተብዴት። እት እብ ንዛም ናይር ለተሌት መናሰበት፡ ርኢስ ኢሰያስ ሕዝመት ዕንቦበ እንዴ ከረ ትሕየቱ እግለ ፍራስ እት ለህበ ዲቡ ወክድ፡ ወጠንያይ ኸሺድ ኤረትርየ ትነሽደ።

እት እንርክ ቅብለት ናይለ ሐዲቀት፡ ድዋራት ሚዳን ‘ሬድ ሰኳር’ ለህለ ወእብ ሸክል መቅበረት ለትሸቀ ተምሳል፡ ዲብ ሰነት 1966 ለትበነ እት ገብእ፡ ዓጭሞታት ናይለ እት ወክድ ካልኣይ ሐርብ ዐለም ለትቀተለው ዐሳክር እትሓድ ሶፔት ምን ብዕድ መቅበራት እንዴ ትረፈዐ ዲብ ዮም 8 ማየ 1967 እንዴ ትከረ ክም ወጠንያይ ታርፌ እብ ሩኣሳእ ድወል እት ልትበጸሕ ወክም



ጁብዳይ ሲያሐት እግል ልግባእ ቃድር ህለ።

እት ካልኣይት አምዕል ሳዐት 4:30 አልዐስር፡ ዲብ ቀሰር ሕኩመት ክፈምሊን፡ አምሐባር ርኢስ ኢሰያስ ወርኢስ ፑቲን ገብእ። እት ዲብ አግደ መከበቲ ጋሽ ለገብአት ህድግ፡ ርኢስ ፑቲን እግል ርኢስ ኢሰያስ ወምሰሉ ለመጽአ ወፍድ ሰላመቱ እት ቀድም፡ እለ ሰልፋይት ዝያረት ርኢስ ኢሰያስ ዲብ ፈደራልያይት ሩሲያ፡ እት ጠወርት ወአቀረየት ለጸንሐት ዕላቀት ክልኤተን ድወል፡ አደቀቦት ናይ ሽራከት ወመትዓዋን ዐባይ አካን ክም ተህሌ እለ ሰእየቱ ሸርሐ። ኤረትርየ 32ይት ሰነት ዒድ ሕርየተ ተዐይድ ዲቡ ለህሌት አሌላት፡ ዒድ 30 ሰነት ተእሲስ ዕላቀት ረስምየት ኤረትርየ ወሩሲያም ክምቱ እት ለሐብር፡ እለ ዕላቀት እለ አስክ እለ ሰጅልቱ ለህሌት ሄራር ወተጠውር እብ አድመኖት፡ ሩሲያ እት መጽእ ወሬሕ ጁላይ ዲበ ትትሐደሩ ካልኣይ ዋዕለ ሩኣሰእ አፍራቀ ሩሲያ እግል ትሻርክ፡ እግል ርኢስ ኢሰያስ ዐዙመት ረስምየት ቀደመ ዲቡ።

ርኢስ ኢሰያስ እብ ጀህቱ፡ እት ለገብአት እሉ ዐዙመት ወክብቱ ውጅህት እት ለሐምድ፡ ወፍድ ሩሲያ እት ሐልፈ ወሬሕ ጀንዋሪ ዲብ ኤረትርየ፡ ወሐቀሁ ወፍድ ኤረትርየ ዲብ ሩሲያ ለወደዉ መፋህማት፡ እግል ተዓውን ሕበር ሩሲያ ወኤረትርየ ለለአደቅብ ምህም መትጋማይ ክም ገብእ እት ሸርሕ ክልኢዮም ሚርሐት እበ ወደዉ መፋህመት ዝያደ ክም ልተረድ ዳምን ክምቱ ሸርሐ።

“ኣይስ ርኢሱ ክመ እለ ኢቀዌክ - ወዘር ካርጅየት ሰርጌ ላሽርቭ ለመርሐ ወፍድ ሩሲያ ዲብ አስመረ ዝያረት እት ወደ ዲቡ ወክድ፡ ደርቡመ ህዩ፡ ወፍድ ኤረትርየ አስክ ሶቺ ዲበ ጌሰው፡ ምህም ናይ መፋህማት ጀልሳት ገብእ። እለ ዮም ክልኢትነ ሩኣሰ ለእንወድየ ጎማትመ፡ ሰኒ ወአማን ካነ ሸርከትነ ክም ተአተርድ ወትወቅል ሸክ አለብዬ። እብ ረአዬ፡ እትሊ ንዛም ዐለም እት መርሐለት ተቅዩር ለህለ እቱ ወክድ፡ ሕስር ዛይድ ለልኣትሐዝዩ ዛህረት ናይ እለ ኣድረት ቅድየት ሰበት ተ፡ ሚዛኑ ለዐቅበ መትቀዳም ወጎማት ሕበር ለኣትሐዘ። ምሰል ለእንወድየ ጌማም ህዩ፡ በራምጅ ሸርከት እግል ንሰትት ለሰዴ ተ። ኖስካመ ክመ አምረ ለህሌኩ፡ ፈዛዐት ሕር ገባይል እት ትትወቅል ማጽኣት ህሌት። እግል ሕሽመት ሕድ፡ መትሰዳዳይ፡ አታማም እግል ሕድ ወዐቦት ለክድም፡ ክምሰልሁመ ዐዳለት ወሕሽመት ቃኑን ለልኣሰብቅ ጥወር እድንያይ ንዛም እግል ልትአከድ፡ ለዲብ ትጠወር መጽኣት ፈዛዐት ደርዖተ ወረሽዶተ፡ ኩሉ መጃሳት ለትሐቅፍ ሻምለት ስትራተጅየት በራምጃት ተለሞት፡ ክምሰልሁመ ለልኣትሐዘክ አርዛቅ አትበጋስ ወእሉ ለልኣሸቄ አግቡይ ብቆዕ ቀፊር ሰኒ ምህም ተ። እለ ህዩ፡ ሕርያን እንዴ ኢትገብእ፡ ታሪካይት መስኡልየት ተ።”

እትሊ መፋህማት እብ ጀህት ኤረትርየ ወዘር ካርጅየት አሰይድ ዑስማን ሳልሕ፡ መፈወድ ዓዳት ወርያደት ሰፊር ዘመዴ ተክሌ ወሰፊር ኤረትርየ ዲብ ፈደራልያይት

ሩሲያ አሰይድ ጴዋርስ ጸጋይ፡ እብ ጀህት ሩሲያ ህዩ፡ ሴድያይ ርኢስ እት ቅደይ ሲያሰት ካርጅ ሚስተር ዩሪ ኡሻኮቭ፡ ኬትባይ አክባር ቀርሰ-ርኢስ ሚስተር ዲሚትሪ ፔስኮቭ፡ ናይብ ወዘር



ካርጅየት ሚስተር ሩዴንኮ አንድሬ ወብዕዳም ኣድራም ዐለው።

እምሰልሁመ ርኢስ ኢሰያስ አፍወርቂ ወርኢስ ቸላድሚር ፑቲን፡ እት አደቃብ ዕላቃት ወመዓወነት ሸርከት፡

ክምሰልሁመ ኤረትርየ ወሩሲያ ሕበር ለክሰስ ናይ መንጠቀት ወእድንያይ ተጠውራት እቱ ለኣተንከበት ናይ በይኖም ጀልሰት ካልኣይትመ ዋድያም ዐለው።

ሄለል ጁን ምን ገጽ ምሴ፡ ርኢስ ኢሰያስ ወምሰሉ ጋይስ ለዐለ ውቁል ወፍድ ኤረትርየ፡ ምን ሞስኮ 51 ኪሎምትር ራይም ለህለ ድዋራት አስኩ ሄረረው። እለ ህዩ ሐዲቀት ምሕርበት ወመትሐፍ ዐስከሪ እግል ልግንሐ ተ።

ሐዲቀት ምሕርበት፡ እት ካልኣይ ሐርብ ዐለም፡ ሩሲያን ምን 22 ጁን 1941፡ አስክ ዮም 9 ማየ 1945 ወራር ናዚ ጀርመን እግል ጋብሆት ሐድ 1,418 አምዕል እምበል አትካራም ለወደዉ ሐርብ፡ ክምሰልሁመ ምን መዲኒት ሌኒንግራድ ናይ ዮም ሰይንትፒተርስበርግ እግል ልዳፊዕ፡ ምን 8 ሰብተምበር 1941 አስክ 27 ጁንዋሪ 1944 እግል መደት 872 ምዕል ለወደዉ ሐርብ፡ ለደፍዐዉ ዐውል፡ ለአርአወ በታከት፡ ለኣረበው እብ ሰለሕ

ወኣላት፡ ለጀሬት ደማር፡ ለኣለፈዉ ተየልል መሪር፡ እት ሐርብ ለሻረከው ምሕርበት፡ ሸሬሕ መስኡሊን ወቅያዳት፡ ክምሰልሁመ ሸዐብ ዓዲ እብ መባትክ ሐጼ፡ ከዋ መዳፍዐት፡ ወብዕድ ሸምል። ዲብ ገጽ 7 ልተላሌ

ምን ገጽ 6 ለተላለ

ሰሐፊ፡ ዳውሎስ ነታባይ
ሰወር፡ ታእዛዝ አብርሀ

ዝያረት ርኢስ ኢሰያስ አፍወርቂ ዲብ ፈደሬሽን ናሰዩ

እሊ እብ ክርን፡ ክቱቡ ሰወር ውበዕድ ኣላት እንዲ ትሓላወ ለትቀደመ ዕፊ፡ እግለ ዝያድ 70 ሰነት ለአዶረ ሐደሴ፡ ኣዜ ገብእ ክም ሀለ ኣስክመ ለአተምሰሉ፡ ለመትደቃብ ተዋልሉ ክም ተሓሰስ እቡ ለወዴክ ሰኒ ለልኣትዐጅብ ጽበጥ ፈን ወሽቅል ቱክኖሎጂ ቱ።

ምን ኣካን እንዲ ኢትኣረይም፡ እት ሰምጦ ብኩይ ለሀለ መትሐፍ ዐስከሪ ትረክብ። መትሐፍ ዐስከሪ ናሰዩ፡ ምን መደት እትሓድ ሶጌት ለዐሉ፡ ወምን ዶል እት ዶል ለትጠወረት ቅወት ድፈዕ፡ መቅደረት ዐስከርየት ለልኣርኤ ኣሰለሕ፡ ደባባት፡ ጥያራት፡ ሳብማሪናት፡ መራክብ፡ መካይን ዐስከርየት፡ መካይን ድርዕ፡ ወናይ ፈደእ መርከባት ለሽምል ቱ።

እሊ መትሐፍ እሊ፡ ኣስክ እሊ ዲብ እዲን ለዐበ ክም ቱ እት ልትኣመር፡ ዲብ መደት እትሓድ ሶጌት ለትሸቀዩ ገዛይፍ ሄሊጥተራት፡ ክምሰልሁም ምን ናዚ ጀርመን ለትሰለበዩ ሰኒ ገዛይፍ ወድሩዓት ደባባት ወመካይን ሕዩብ ሀለ።

መመቅረሐት ናይ ክልኢተን መኣሰሳት እግል ርኢስ ኢሰያስ አፍወርቂ ወለምሰሉ ጋይስ ዐለ ወፍድ ኤረትርየ እብ ክሰላለ ክም መሰል ለትቀደመ ወሽዐብ እብ ብዝሒ ለበጽሑ ሰናዓት፡ ክምሰልሁም ምህም እት

መትወራራስ ታሪክ ወለሐልፈ ዲብ መትዝካር ለሰዲ እብ ተፋሲል ሽርሐው እሉ።

ርኢስ ኢሰያስ ወምሰሉ ለጌሰ ወፍድ፡ እት ራብዓይት ምዕል፡ እት ምግብ መዲነት ሞስኮ ለሀለ እት መጃል ሽቅል ናይ ኩሉ ወራታት ብነእ ናሰዩ ምህም ታሪክ፡ ዓዓት፡ እዳረት፡ ሲያሲያይ ወናይ ደያነት ጽበጥ ለከምክም እት 28 ሄክታር ብኩይ ለሀለ መብኻ ክፈምሊን ወዲቡ ለሀለ ኣሳር ትፈረጀው። እብ ክሰላ ሀይክል ናይ እሊ እት ታሪክ ናሰዩ ምህመት ኣካን ለጸብጥ መባኒ፡ ወዲቡ ለሀለ ኣሳር ወረሰም፡ ክምሰልሁም ዕሉም ሀንደሰት ብነእ፡ ኣብያት መቅደሴ፡ ውበዕድ ለልኣትፈክር ታሪካይ ጽበጥ እቱ ተውዴሕ ተህየበዩ።

እትሊ ሐሽ ክፈምሊን ምን ሀለ ኣሳር፡ እት 16ይ ወ18ይ ክፈፍል ዘበን ለትሸቀው ክልኢት ለልኣትፈክር ወአህምየት ዛይደት ለም ኣሳር ህለው። ለምር ምናም፡ እት ሰነት 1586 ለትሸቀ መድፊዕ ቱ። እሊ 400 ኩንታል ለልትመዘን፡ ወ5.54 ምትር ለሪሙ መድፊዕ፡ ዐጃይብ ለልኣተብሉ ጋር፡ ምን ልትሸቂ ላክፍ ምንመ ኢኮን፡ እብ ግዝፉ ሌጠ ዲብ ዕድዋን ሀረከት ፈርሀት እንዲ ክልቁ፡ እት ዳፍያት መዲነት ሞስኮ ዶር ዐቢ ለአግዓቱ።

ለካልኣይ ሸክል፡ እት 18ይ ክፈል ዘበን ለትሸቀ መደወን ገናድ ቱ። እሊ 2000 ኩንታል



ለልትመዘን፡ ምን ኣሰራዚ ለትሸቀ መደወን፡ ምን 14-18 ሰብተምበር 1812 ለሳደፊ ነድ እብ ክልቀዩ መትባዳል ሐፋነት፡ ዝያድ 110 ኩንታል ለልትመዘን ክፋሉ ሰቡር ምኑቱ። ለ10 ምእታይት ናይ እሊ መደወን ለገብእ ፍላም ህዩ፡ ኣስክ ሃድል ዮም እት ኣፊትለ ምኑ ትሰበረ መደወን ጽጎዕ ሀለ። ለልኣትዐጅብ፡ እሊ እግል ሐቱ ምዕልመ ጀረሱ ናቅም ለኢለኣምር መደወን፡ ኣስክ ዮመቱ እት እዲን ለዐባ ቱ።

ሐቕ እሊ ለተለ ሰፈር፡ እት ለትፈናተ ኣውካድ ለዐለው ዳራት ናሰዩ ለልኣርኤ ኣሳር በሀለት ለቡብሴ ሰርጎ፡ ካሮታት፡ ጽዋር ወደሬዕ፡ ዐርሽ ሽመት፡ ደባቢር፡ ወሳይቅ ውበዕድ ዝያድ 40 ኣልፍ ዐጃይብ ኣሳር ለብእቱ ‘መትሐፍ ከዚነት-ኣሳር’ ቱ። እሊ ምን 1806 ክድመት ለሀይብ ለሀለ መትሐፍ፡ ምን ኣግደ መራጃዕ ታሪክ ወጃዝባይ ቤጽሐት ናሰዩ ቱ።

እት ደንጎበ ርኢስ ኢሰያስ፡ ኣርዛቅ ጠቢዐታይ መዓድን ናሰዩ እብ ዓመት፡ ኣልማዝ፡ ደሀብ ወኣሻም ቃሊ፡ እት ክሩይ ዲቡ



ለሀለ መትሐፍ በጽሐ። እሊ መትሐፍ እሊ፡ እብ ቂመቱ፡ ሸክሉ፡ ግዝፉ፡ ከባደቱ፡ ቅራጥ ወለትሐፈረ ዲቡ ሰኒን ለፈናቱ ከፈሰር ዝያድ 15 ኣልፍ ፈለልም መዓድን ሀለ እቱ። ክል ፍላም መዓድን ህዩ ናዩ ዐጃይብ ታሪክ ቡ።

ዝያረት ርኢስ ኢሰያስ አፍወርቂ፡ ኣግደ ኣርእስ ዔማት ኣክባር ናሰዩ ጋብኣት ኣስመነት። እት ረዋዲ፡ ጀራይድ፡ መሕበራይ ሚድዮ፡ ወተለፍዝዮን ለከድመ ዔማታት ‘ስፑትኒክ ኣፍሪካ’ ወ ‘ራሻ-ቱደይ’ በሀለት RT ህዩ፡ እብ ክሰላ ሀደፍ ዝያረቱ፡ ዕላቀት

ኤረትርየ ወናሰዩ፡ እድንያይ ገዛም ወዶር ክልኢተን ድወል፡ ክምሰልሁም ናሰዩ እት መጽእ ወሬሕ ጁላይ ዲብ መዲነት ሰይንት-ፒተርስበርግ ለትትሐደሩ ወዕላ ሚርሐት ድወል ሀደፍ ወአህምየቱ ለኣተንክበት መቃበለት ወደዩ ምሰሉ።

ርኢስ ኢሰያስ አፍወርቂ፡ እብ ዐዙመት ርኢስ ሸላድሚር ፑቲን እት ፈደሬሽን ናሰዩ ለወደዩ ዝያረት ረስምየት እንዲ ኣትመመ፡ እት ዮም 4 ጁን 2023፡ ሳዐት 6:00 ጽቤሕ-ምድር ኣስመረ ኣቅበለ።





ነጃት ዐሰማን



አተላላይ ዐዳወት አሜርካ ዲብ ኤረትሮፖ ለትቀረረ ቀራራት መኔዕ ወፍርድ ሐዲሱ፡-

3ይ ወናይ ደንገበ ክፋል

1) ቀራር 14046 ለልትባህል፡ ዲብ ቅድየት መኔዕ አንፋር ለረከዘ፡ ወእብ ሰብብል ዲብ አቶብዩ ለትከለቀ አፍዓል ጀራይም ኪደት ሐቅ አዳም፡ እብ ርኢስ ሕኩመት አሜርካ ጀሴፍ ኣር ባይደን ዲብ ፍዕል እግል ልውዕል ለትፈረመ ቀራር የም 17 ሰብተምበር 2021።

2) እብ ተፍኪር እዳረት አሜርካ፡ እሊ መኔዕ እሊ፡ እግል ዲብ አቶብዩ ክላፋት ወሐርብ እግል ልትከለቅ ወልትራየም ለከድመው፡ ራድኢት እግል ኢትኦፔ ለመንዐው፡ ምስዳር አብጠርት ዘብዋ እግል ኢትነሰእ ለዐንቀፊው፡ አውመ ምስል እለ ቅድየት እለ ምስንዮት ለዐም አንፋር ለአመመ እት ገብእ፡ ለእዳረት አሜርካ፡ እበ ለከሰሶም ጀሃት፡ እግል ዲብ እለ ቅድየት እለ እዴ ቦም ለቴለቶም ጀሃት ሕኩመት አቶብዩ፡ ሕኩመት ኤረትሮፖ፡ ጀብህት ተሕሪር ትግራይ፡ ክምሰሉሁመ፡ እዳረት አቅሊም አምሐረ ወብዕዳም፡ እብ ተመን መደረት ሽዑብ አቶብዩ በደል መፋህመት ወሰላም፡ ሐርብ ወደማር ለሐረው ጀሃት መስኦልየት አርፊየት ልብል።

3) እዳረት አሜርካ ዲብ ረኢስ ሚርሓይ ዐስከሪ ኤረትሮፖ እብ ምስምስ ናይለ ዲብ አቅሊም ትግራይ ጀሬት ለትብህለ ጀሪመት ኪደት ሐቅ አዳም፡ የም 23 ወሬሕ 8 ሰነት 2021፡ እብ ተፍኪር እዳረት አሜርካ አው (ዲፓርትመንት ኦፍ ትሬጀሪ) ናይ ሕኩመት አሜርካ ወመክተብ መራቀብት አርዛቅ፡ እግል ርኢስ ህይኢት አርካን ወብረት ድፊዕ ኤረትሮፖ፡ ጀነራል ፊሊጶስ ወልደዮሃንሴ “ሚርሓይ ናይለ ዲብ አቅሊም ትግራይ ለገብአ ጀራም ኪደት ሐቅ አዳምቱ” እንዴ ትብህለ መኔዕ ፋርደት ዲብ ህሌት። እብ ተውሳክ ለጀህት ተንፊዝየት እዳረት አሜርካ፡ እግል ጀነራል ፊሊጶስ እብ ደረጀት ዐለም መስኦልየት ኪደት ሐቅ ውላድ ሚን ኣደም ወፊሳድ ሻክዩ፡ ህሌት።

4) እዳረት አሜርካ ምስል ኣከይ-መቅሬሕ አቶብዩ እበ ለትትጸበዋ ገበይ፡ 4 ጀሃት እብ ሕበር ወ2 ነፊር እብ ብሕተ፡ እብ ሰብብ ኪደት ሐቅ አዳም፡ ጀራይ እንሳንየት፡ አትሳወርት ኣከይ መቅሬሕ አቶብዩ፡ እብ ቀራር ዕልብ 14046 ሻክዩም ህሌት። እምበል እሊመ ዲብ ኤረትሮፖ መኔዕ ፍፋድ እቶም ለህለ አንፋር ጀሃት ወመ-አሰሳት።

□ ቅዋት ድፊዕ ኤረትሮፖ፡ ኤረትሮፖ መትኣሳስ ዲብ ሰነት 1993፡ ናይ ሕኩመት መኣሰሰት።

□ ጀብህት ሻዕብየት እግል ዲሙቅራዊየት ወዐዳለት፡ ኤረትሮፖ ዲብ ሰነት 1993 ለተኣሰሰት መኣሰሰት አው ጀህት። ጀንሰ መኣሰሰት፡ ሽቅል አትፋዝየት ስዩሰት ለትወዴ መኣሰሰት።

□ አብረህ ካስ ነማርያም፡ ኤረትሮፖ፡ ዕለት ተውሊደት የም 15 ወሬሕ 7 ሰነት 1953፡ ጀንሰየቱ፡ ኤርትራ፡ ጀንሰ ተብዐት፡ ዕልብ ጀዋዝ ሰፈር፡ D000294።

□ ሐንሰ ገብርሂወት ወልደኪዳን አስመራ፡ ኤረትሮፖ፡ ዕለት ተውሊደት 25 ወሬሕ 4 ሰነት 1953፡ ኣካን ሚላድ ሰንዕፊ ኤረትሮፖ፡ ጀንሰየት ኤርትራ፡ ጀንሰ ተብዐት፡ ረቅም ብጣቀት 0882109።

□ መኣሰሰት አማነት፡ በህለት (ማዕከን ሕድሪ)፡ ሻሬዕ ፊልከት፡ አስመራ - ኤረትሮፖ፡ ዲብ ሰነት 1994 ለቂመት መኣሰሰት።

□ መኣሰሰት ትጃረት በሐር ቀየሕ፡ ሻሬዕ ፊልከት፡ አስመራ ኤረትሮፖ፡ ዱብይ በህለት ኣልኡማራት ኣልዐራብዩ ኣልመተሕደ፡ ዕለት ታእሲስ ሰነት 1994 ትብል።

እሊ እብ እዳረት አሜርካ ለፊግረ ክቱብ እት ረኢስ እሊመ፡ “ኤረትሮፖ ለትሻቅል፡ ለትኣፈርህ ወለተኣሰፍ ዐድ ኪደት ሕርየት ደያናት” እንዴ ቤለ መኔዕ ፋርድ ዲብ ህለ። እብ ኣሳሰለ እድንያይ እዕላን ሐቅ ሕርየት ደያናት ሰነት 1998፡ ኤረትሮፖ ሐቅ ሕርየት ደያናት ሰበት መንዐት፡ ቀድያት ካርጅየት አሜርካ እግል ኤረትሮፖ ዲብ ሰጅል ናይሉ፡ “እብ ፍንቱይ ለሻቅል ተዩልል ለብዲብ ዱለት” እንዴ ትብል ምን ሐዲስ እግል መረር ወኣትካስሐት ሓጽየተ ህሌት። እሊ ቀራር እሊ፡ ኤረትሮፖ ምን ጀህት አሜርካ፡ ሰዳይት ዲብሎማሰየት እግል ኢተህሌ ለከፊዕቱ።

እብ ተውሳክ፡ እዳረት አሜርካ ወእብ ፍንቱይ መክተብ መራቀብት አርዛቅ፡ እግል ኤረትሮፖ፡ ዲብ ናይ ሰነት ተቅሪራ፡ “ጀራይም መታጀረት እብ አዳም ለልትረኤ ዲብ፡ አውመ፡ እግል አንቀሶት ዐደየት አዳም ምን ለልትጠለብ ዋጅባት ለይኣትመመት ወለኢትጸገመት ደውለት” እንዴ ቤለ ዲብ ሳልሳይት ደረጀት ርቱብ ህለ።



እት ቀበት እለን ለሐልፊያነ ሰኖታት፡ ለአርኤናሁ ተጠውራት እብ ቀሊል ለልትረኤ ኢኮን። እብ ሰላም ወመስከብት በራምጃት ዐማር እንዴ ኤተንክ ዲብ ክለ እለ ደረጀት ብጽሐት እግል ኖስ ቀላል ኢኮን። እግል መሰል እለን የም እብ ዐቦት ወተጠውር እት ቀደሚኒ ልትፊራረቀ ለህለየ ድወል፡ እብ ሐትሐቴ ታሪክን እብ ምን ንስኣል ክል ሐቴ ከናየ መሻክል ወታሪክ ሰዱድ ሐልፋት ክም ተን ለልዘከር ቱ። ሕነ ህዬ፡ እብ ታሪክ ፍርስነት፡ ታሪክ ኤማን ወመሰባል ለንተአመር፡ እብ ደማነት ኖስ ወራትዕ ስታት ለእንክድም ምጅተመዕ ሕነ። እሉም የም ታሪኩም እንወርስ ለህለነ ሰብ ሕሹም ታሪክ ላቶም ዋልዴን ወሐውነ ኣሰክ እለ ተረቶም ሰኢ ዐባይተ። ሰበቡ ለመውርስት ናይ እሊ ክሉ ታሪክ ህቶም ሰበት ገብአው። እግል ንውረስ ምኖም ህዬ፡ ናይነ ንዩት እግል ተህሌ ወጅብ፡ ታሪክ ለሻቂሁ ወለሓድሩ ሌጠ ለአወርሱ ወከትቡ ወሕነ ነኣትዋርሱ። ከታሪክ ፈራሰት ህዬ፡ ኖሱ እግል ትውረሱ ለኣትናይተክ። ከሰበት እሊ ለዶር ናይነ ለሸባብ ክምቱ ኢንትረሰዕ። ሸባብ ህዬ፡ ሰለስ እዴ ናይ ምጅተመዕ ሰበት ቶም ክለ ለእማነት ዲብ ረኢሶም እብ ግብኣተ ክሉ ጸር ጸርም ክም ቱ እንዴ ኣመርው ወካድም የም እግል ፈጅር ቅብላት ኣባይ ወፊታይ እግል ለኣሸንንና ክም ቱ፡ እግል ንትረሰዕ ለኣለብክ ምህም ንቅጠት ቱ። ካድምን ካድም እግል ውሕደት፡ ካድም እግል ተዕሊም፡

ካድም ዐማር ወጠን፡ ካድም ቅየም ምጅተመዕ ለነዕቅብ እብ፡ ካድም ወርስ ታሪክ እግል አጅያል፡ ዓዳትነ ናቅሰት እንዴ ተመት እቱ ወጭዊት እንዴ ረትዐት ዲብ እግል ራትዕ ሀደፍ ወመባጽሕ ሰኢ ምን እንሸቁ ዝያድ ክሉ ህለየትነ ነኣክድ በህለት ቱ። እዲነ ክል መረት መጃገረት ቱ።

ታሪክን ወታሪክ ክሉም ሽዑብ ክመ ልሸህዱ ወለሓክዩ እትለ



ኮዋን ገሕቴላይ

ናይ መጃገረት ዐለም፡ መጅተመዕ እግል ልድሐን ወደማነት ልርከብ ሌጠ እንዴ ኢገብእ፡ ፋዝዕ ወፋህም ወመትጃግራይ ምጅተመዕ ምስል ተክናሎጂ ወዐውለመት ምን ገብእ፡ ዝያድ ክሉ ዐቦቱ ወሀለዩቱ ለትኣከደ ፋዝዕ ሻብ ነኣፊሬ ክም ህሌነ ልትኣከድ እግልነ። ሕነ ክም መጅተማዕ ወወጠን፡ እት ዐቦት ወዐውቱ መጃገረት እንዴ ገብኣነ ምን ሳድፊነ መታክል እዲነ ንትባለሕ። መትጃግረት እግል ንግበእ ህዬ ሸባብን መቅደረት፡ ፈዛዐት ወትሩድ አምር እግል ልጃቅፎ ምህም ጋር ቱ።

እብ ደረጀት ቃረት አፍሪቃ




ሐርስ ገርሰት

ልግበእ ወዐለም መትጃግረት ወበድሮም ለኣለቡ ምን እንገብእ እግልነ ለሸባብ ገጽ ቀደም ለነኣሳድር እቱ ተዩልል ክምቱ ልትኣከድ እነ። ሸባብ ምን እቱ ህለው አጥራፎም እንዴ አንበተው ኩሉ አጥራፎም ኣሰክ እብ ደረጀት ወጠን ወዐለም ክሉ ተዩልል ኣመርት ለለኣተሐዜ ጋር ቱ። መቀየሲ መትጃግረት መጅተመዕ ህዬ ሸባብ ክም ቶም ለኢትረሰዕ ቱ። ሸባብ ህዬ፡ ደም፡

እንገዖ ወትንፋሰ ናይ መጅተመዕ ቶም። ፋዝዕ ወእብ በቃዐት ለኢሸቁ ሻብ ለኢጸብጠ መጅተመዕ፡ ወለ ሐቴ ዐቦት ወተጠውር እግል ለአርኤ ኢቀድርኒ። እቱ ሐልፊ ሄራርነ እብ ፍዕል አርኤነ። ሸባብ ዲብ ክል ወቅት እግል መጸግም እንዴ ጋብሀው እሊ ቱ መስተቅበልነ አድመነ ወዲብ መጦር ዐለም ገብኣነ ወነፍሰነ ቀደርነ። ሸባብ ኤረትሮፖ ህዬ፡ እለ አማን እለ እግል ኣከዶት ሀደፍነ ወመስኦልየትነ ክም ሐቀቅነ ዝያድ እግል ነኣክድ እንፈቱ። እግል ክሉ መጃል እግል ንጋብህ ዱሉያም ክም ሕነ ገለድነ ነኣትሐድሱ። ዐቦት ወመትቀዳም መጅተመዕ ህዬ፡ እት መቅደረት ሸባብ ሌጠ ለኣተንክብ። ሕነ ሸባብ መትጃግረት እዲነ ክም ሕነ ኢንትረሰዕ፡ ከህለየትነ ህለየት አማን፡ ደማን ወሰባት ለቡ እግል ልግበእ ዕነ ናይ የም መስለሐት እግል ንርኤ ኣለብክ ረዩም እግል ነኣኖኬ ወእግል ፈጅር ለትነፊዕ ወምስል ናይ ተጠውር ወዐቦት ሸባብን ለገደሰ መዋድዕ እቡ እግል ንሕሰብ ወንፈክር መስኦለት ክል መዋዋን ቱ።

ተመህ ቀደር



ሸሀር ቱት እግል ልክለስ ቅሩብ ዐለ። እምበል ሐዳት አምዲላት ሐቲመ ታርፈት ምኑ ይዐለት። ደደፍ ምን ቤት ብሻውሮ አስክለ መድረስት ለሐርብየት እግል ልትሳረሕ ታርፍ ምኑ ለዐለ ወቅትመ አክል አሕድ አክል እለን አምዲላት እለን ሌጠ ዐለ። እለን አምዲላት እለን እግል ዛየ ምነ ለትኬለመየ ወሀ'መት ለመልአተን አምዲላት ዐለየ። እበ መራረትለ ክልኦት ሸሀር ለእንዴ ኢትርእዩ ዲብለ መድረስት ለለሐልፈን፣ ወለ ሰኖታት ለእምበል ሐቲ አምዕል ዲብ ሸሀር ምን ርእየትለ ገጹ ባርህ ወለ ክርኑ ሞዕም ለትትሐረም እተን እት ተሐሰብ ራሐት ወሰኑብ በደየ ምነ። እለ እዲነ ረሕመት አለበ! ለልበ አስክ እለ ለመስአለት እንዴ ኢትጀሬ ትሰፍለለ ወትሰራበቡ። ወለ እዲናህ ክም ጸብዋ ለወላዊል ልትሻተፋ እንዴ ገበት ትረኡተ።

ለደውረሀት አሰቡሕ ብዳየት አምዕል ሐዲሰት እግል ለዐልነ እት ለአዝነ ዶል አንበተየ ምነ ምትክራረ ፍርግልዋ ትቤ ወሰኒ ርብሸት ወእሰፍት እት እንተ እብግሳየ ገብኦት። እለ ሰልፋይት አምዕል ሰፈላለ ወሰርቤበ እግል ትትከበት እብ ክለ ሐሊተ አተንፈሰት። ምነ መስከበ እብ ብጣረ እንዴ ገብኦት ደደፍ እንዴ ሀረሰት እግል ትሳርሐ ሻፍገት እት እንተ አስክለ መስከቡ ረትዐት። እግል ኢትረብሽ እብ ምልሃህ እት ትትጫፈር ዲብለ ቁርፈቱ ክም አቲት። ጃሙርክ እት ልትማቀኦ ትከበተየ። ክም ምራደ ኢገበኦ እለ ለጀነ እምበል ሰዳይተ በዲር እንዴ ቀንጸ ወትፋሰስ ጸንሐየ። እብ ክርን ድሀርት ነሺድ “ሕነ ውላድ መሰር ምን አስል አልሀት ትወለድነ” ለሐሌ ዐለ። ለጀነ እብ ኖሱ እንዴ ፈዘዐ ሊከ ዐስከርየት ትከበተ። ምነ ኩሉ ልበ ደደፍ እት ትብል ነቅመቱ። ልብ ዶል ከረ ዲበ ክመ ሰፊረት ለምድር ጸብሕ እለ እብ ኩሉ ሐሊቱ አስከ ሰዐ ወዲብለ ወሪደ ሕንኮከ እንዴ ገብኦ እሌ። እበ አፋታየ ገጹ ለዐል አስከ አግሀጸ። እብ ረሕመት እተ አፋሁ ሰዐመቱ። ወእተ መላትሕቱ እንዴ ደግመቱ ዲብለ ሕቅፈ ክብ አበለቱ ከዲብለ እንገራቱ ክም ሰዐመቱ። እንዴ ረፍዐቱ ክምእለ እት ትብሉ በረ ፈግረት እቡ።

- ሕልብዬ ወድራርዬ። ንዐ እግል አቡከ ሳርሐኒ በሉ።

ብሻውሮ አስክ እለ እብ ሰኑብ ክቡድ ቅንራፍ እት ልብል ጸንሐየ። እበ እዴህ ዶል ነክኩቱ ንፋድ እት

እንቱ። “ምን እንተ? ፡ ምን እንተ? ፡ ዛየ እንቲ!” ቤለየ።

እት ትትሰሐቅ ክምእለ ቴለቱ። - ደደፍ ኢትሳርሐ ማሚ?

እተ ምስኑበ እብ ግሳየ ገበኦ ወዕንታቱ እንዴ ዳክክ ዲብለ ድሀርት ለዐለት በርሀትለ ፋኑስ አስክለ ጀነ እንዴ አቅመተ ክምእለ ቤለ።

- ደደፍ፣ ትበገሰክ? ንዐ ደዐ እግል እውዳ እግልኩ ግድም ትወክል ረቢ ልሕፈዘክ ወልራዴክ! ወእተ ረአሱ እንዴ ሰዐመየ ክም እለ ቤለ።

- ደደፍ አዜ እንተ ንኡሽ ሀሌከ ምናተ ጃንዲ ዕሉም እግል ትግበእ ቱ። እነ ለእስእየ እትከ እላተ። ብሻውሮ ኬድማይ ፈርዐን ህዬ ሰእየቱ ኢልስእን፣ ትበገስ ወልዬ ሰላመት ትታሌከ እት ወቅት ሰላትዬ እግል እደዴ እግልኩ።

ደደፍ እዴ ዋልዳየ እንዴ ሰዐመ ምስል ዋልዳይቱ ፈግረ። እተ አፊት ክም ፈግረው ኹነ ወናፈ ዱሉያም እት እንቶም ጸንሐዎም። ናፈ እት ልትሰሐቅ ክምእለ ቤለ።

- እንተ ፋርስ ዐስከሪ ግድም ቅነጽ ዲብነ። ለዐረብየት ትታኬነ ሀሌት።

ዛየ እብ ረሕመት ለኩብደ እት ትትረማጠዋ እቅምት አበለቱ። እብ ፈተ ወልውቀት አቅመተየ። አላህ! ለአዋርሕ ሻፍጋት እት እንተን ሐልፈየ ወሳዐትለ ሰርሐ ተመት። አዜ ግድም መትሓቃፍ ወመትሳዓም ወአናብዕ ሐቲመ ፋእደት አለበ። ደደፍ እበ ስልም ምስል ሐወ እንዴ ትከረ ዲብለ ዐረብየት እተ ምግቦም ትገሰ። ለዐረብየት እለ ቃሊ ጦረ እንዴ ረፈዐት ክለ አፊመት ከዕንታት ዛየ አናብዕ ዘሬ እንዴ ዐለ ለገጸ ጸሓይለ ፈጅር ክም ጀልጠቱ እለ ቤተ አቲት።

ለዐረብየት ጸሓይ እንዴ ኢትፈግር “ከሬረት አበሰ” በጽሐት። ምነ ዲብ ባካት መዲነት መነፍ ለልትረከበ ደዋሒ እለ ለገረመት አካንተ። ላመ መድረስት ለሐርብየት ዲባቱ ትትረከብ። ለጋድም ቀደምለ መድረስት ምነ እብ ዐስከርየት እግል ለአልተሕቀ ረቅብት ለዐለት እሎም ደረሰ ምሉእ እት እንቱ ጸንሐየም። አሮቶምተ ከእሮት አውመ ምን አሮት ወለዐል ምነ አቃርቡ ዐለው ምስሉ። ክል ምኖም ስሙ አስክ ትነድህ ለአተናሴ ወተረቱ ልትጸበር ዐለ። ወሐቆህ አው እተ ቀበትለ መድረስት ጸንሕ አውመ እበ አሰሩ ለአቀብል ዐለ። ለጋድም ለአምዕል ለሀ መዕረድ

ናይ ለሐሰየ አፍሩስ ወለ ገረመየ ዐረባት መስል ዐለ። እለ ህዬ ዲብለ መድረስት ለሐርብየት ለለአልተሕቀ ኩሎም ውላድ ጠበቀት ሙሐርበት ወሸየምለ ዐድ ሌጠ ሰበት ዐለው ቱ። ደደፍ ማን ወገለብ ምን ትዋለበ ለአግጸት ይሐደሰ ዲቡ። መደትለ ድራሰቱ ለእብትዳእየት እግል ሰኖታት መልህያሙ ለዐለው ቶም። ለነፍሱ ሰኒ ትለወቀት ወእብ ሐድ ለአለበ ፈርሐት ሸዐረ ወሰኒ ትሸጀዐ።

ክርንለ ነፈር ለአሳሚ ነድህ ዐለ ተኦትካርም ይዐለት። ላመ ደረሰ እብለ ዐቢ ባብለ መድረስት አሰር አሕድ ቱቱ ልብሎ ዐለው። ሰሮም እባሆም እተ ቀበትለ መድረስት ተርፎ ዲብ ህለው። ገሌሆም ህዬ ካጅላም ወእሱፋም እት እንቶም እበ አሰሮም ለኦትቃብሎ ዐለው።

ኹነ ዘሀጃን እት እንቱ ለአግጸት ለሀይ ለትቃምት ዐለ። ደደፍ ለሓለቱ ሰበት ኢበሰጠቱ መሀመም እት እንቱ ትሰአለዩ።

- ሚቱ ዲብዬ ትትሻቀል ህሌከ ሚደሐንካቱ?

ለመንደላይ ዲብለ ነዳይቱ እንዴ ጠብጠቦዩ።

- ኢፋልዬ ፋርስ ሐብ። ዐስከርየት ሐያት ሙሕተረመት ተ። ምናተ ክም ሸርጥ ዋጅብ ዓም እንዴ ገበኦት ለገበኦ ሙዋጥን እግል መደት ሕድድት ናዩተ እግል ለሀርስ ምነ ብእቱ። ሐቆህ አሮ'ተ ከእት እዲናሁ ልትፈረር። እለ ህዬ እትለ እለ ፈቱ ህዋየት እግል ልትበገስ ወርሐ ምን ተለፍ እግል ልዕቀብ ሰድዩ። እለ ምስልዬ ዲብ እንተ ለከሰብካሁ መሳእል ዕልም ክም ኢትትረሰቡ ሰእየት እወዴ። ምናተ ዲብ ዐስከርየት እብ በይነ ሌጠ መትፈራር። ምን እንሳንየት ሐር አቅበሎት ወደመሮት ሐያት ወዐቅል ወክም ሸን ገመል ገጽከ ሐር አስክ መርተበት ሐዋናት መትሸልሃት ልትዐለብ።

ናፈ ክመ እተ ዓደቱ ትሰሐቀ ወክም እለ ቤለ።

- ሐብ። አማን ተሐይሰ እንተ ሐያት ለባበት ወጠሃረት ሐያት ከሁኑት ትታኬ ህሌከ። ምናተ ከረ እዬ ለመስሎ ግርመት ወምትዐት ሌጠ ልታከው ወአሰረ ለዐልጆ። ወእምበሌናመ ብዕዳም ህለው። እ'ሎም እሎም ትርኢ ህሌከ ጅትድ ቶም። መትፈካር ወአስተንተኖት ኢፈቱ ወእግል ሐሊት ሌጠ ለዐብዶ። ሐምዴ እግል እምነ “ኡዘሰ” ትግበእ። ዐቅል ግርመት ናይ ኩለን እለን ሐዮታት እለን ለእፈንቴ እቡ ሀበተኒ። ምናተ እት ደንገበ አነ ለእፈትየ ሐያት ሌጠ ሐሬ። አማን ምን ንትሃጌ ህዬ እት ፍንጌ እለን ሐዮታት እለን ለሀለ ፈርግ እምበል አሮት ዓልም ወጀፈር ሐቲሀን ለኢጸብጥ ዓድል ወለቢብ አሮትመ ኢለአምሩ። ወክምስል እለ ለመስል ቃዲ ህዬ ልትረከብ ኢመሰለኒ።

ምንኬንለ ጨባብ ለህሌት መንገአት

ቀደም ብዙሕ ሰኖታት ዲብ ምሮት መዕበድ ለሸቄ ነፈር ዐለ። ለእናስ ክም አሚን ናይለ እተ መዕበድ ለልትረከብ ዐፍሸት እንዴ ገበኦ ቱ ሸቄ ለዐለ። ዲብ እለ ወዘፈቱ አሚንለ መክዘን እት እንቱ ሐድ ዕሰረ ሰኖታት ሐሉፍ ዐለ።

ምዲርለ መዕበድ ለዐለ ነፈር ሰበት ትረሐመ ሐዲስ ምዲር መዳ። ለሙዲር እናስ መንደላይ ቱ ዐለ። ከዲብለ መዕበድ እበ እሉ ደርሰ አግቡይ ሐዲስ ወናይ ዘመኑ ላቱ ብስር ወአግቡይ እዳረት እግል ለኦትኦቱ ሰበት ሐዜ። እግል ምዲር ሸኡን አፍራድ ናይለ መዕበድ ከልፍየት ናይለ ገብኦ ዓምል ለከሰስ ከሸፍ ዓም እግል ልቀድም እሉ ጠልበ ምነ። ለከሸፍ ክም ትቀደመ እቱ ተማም ባሐሰዩ ውሐለት ወቅደረት ወደረጀት ድራሰት ናይለ ዑማል ተማም ክም ትፋጠነ። ስምለ አሚንለ መክዘን ኦብጠረቱ። ለዐለት እሉ ደረጀት ምን አቅመተ እንሳን እሚ ምን ድራሰት ወለ ሐቲመ ፈሰል ለአለቡ እት እንቱ ጸንሐየ። እግል ምዲርለ ሸኡን አፍራድ እግል እናስ እግል ልሳርሐ ሐበረዩ። ህቱ ህዬ እለ ነፈር ምን ዕሰረ ሰኖታት እት እለ አካን እት ከድም ጸንሕ ቱ። አዜ እብ ክም እለ ለትመስል ገበይ እብ ከፍ አሳርሐ። ገሌ ሐል ርከብ እሉ እት ልብል ትረጀዩ። ለምዲር ለጀዲድ ክም ሐል። ለነፈር ድራሰት ምተዋሰለት እንዴ ነስኦ እት ሐጨር ወቅት እብ ውሐዱ ሳልስ ፈሰል እግል ልብጸሕ ወምን ቅዌት እግል ልትባለሕ ክም ብእቱ። ወእሊመ ጀላብለ ህሌት እሉ ረያም ክብረት ለትህየቦዩ በክት ክም ቱ ሐበረዩ።

ለእናስ እለ ቀራር እለ ተሐበረዩ ወእት ወቅት ሺቡቱ ዲብ ተዕሊም እግል ልትፈረር አሰአለው። ህቱ ላቱ እለ ሰበር እለ ለልትዐዴ እበ ሐለት ወምራድ ሰአኑ። ከለምዲር ለሐዲስ እግል እናስ ምነ ወዘፈቱ ኦብጠረዩ።

ለእናስ ሐቤታትለ ሕጉን እንዴ ነስኦ ለምድር ጽልሙት እቱ እት እንቱ ወለ እለ ባሰር ቃዊ እት እንቱ አስክ ቤቱ ትወክለ። አምዕል ሓሪት ቀደምለ ቤቱ እንዴ ትገስ እበ ሓለቱ ውሐለት ዕያሉ እት ለሐሰብ። ብዝሓም ሰጃይር ለለአተኖ እተ ባክ አካን ሰጃይር ምን ለአምር ትሰአለው። ለመንጠቀት ክሉ ረአሱ ጠብልየት ሰጃይር ለትትበህል ይዐለት እተ። ለብዝሐለ ምን ሰጃይር እት ልትሰአሎ ምጽኦም ልዐለው አዳም ክም ረኦ ፍክረት መጽቱ። ህተ ህዬ ጠብልየቲት እንዴ ወደ ከሰጃይር እግል ለአዝቤ። ወለፍክረቱ እንዴ ኢልውዕል ወኢልትመዬ ዲብ ዐመል ተርጀመዩ።

ለእናስ ረቢ ፈትሐ ዲቡ ወምን እለ ጠብልየቱ እት ሐጨር ወቅት ዲብ ዐቢ ዱካን ወአሰሩመ ዶል ከምአሰሰት ሐቱ እት ወዴ በዐል የም ለአለቡ ማል ገበኦ።

ህቱ ደለ እሉ ረክብ ማል አስክ በንኪ ደንኩ ዐለ እት ኢኮን እት ሚመ ክም ለአውዕሉ ሐቱ ፍክረትመ ይዐለት እሉ። ወእብላሁ ለማል እተ በንኪ እት ልትአከብ ሰኒ በዝሐ።

ሐቱ አምዕል ምዲርለ በንኪ ዐማዊለ በንኪ ለከሰስ ተቃሪር እንዴ ጠልበ እሉ እት ልትፈከር። እለ ማ'ለ እናስ ርኦ። ለማል ሰኒ ብዙሕ ዐለ። ምናተ እት ብዙሕ መጃላት እንዴ ትከሰኦ ብዝሕት ፋእደት እግል ትትረከብ ምነ እት ወጀቡ እምበል ፋእደት ሳክት እኩብ እት እንቱ ክም ርኦዩ። ዕንዋንለ በዐሉ ነስኦ ከእብ እሕትራም ወሕሸመት ለትከሰተት ወለ እዳረትለ በንኪ እግል ትቃብሉ ክምትትዐሽም ለትሸፊሕ ርሳለት አስክለ እናስ ከትቤ።

ለእናስ ክመ እለ ትበህለ እተ ተሐደደ እሉ ወቅት ምስለ ምዲርለ በንኪ አጅተመዐ። ምዲርለ በንኪ እግል እናስ ለማሉ እት ፋእደቱ ወፋእደት ወጠኑ ለልውዕል እቡ የም አለቡ አግቡይ ክም ሐበረዩ ወትሻወረ ምስሉ ገሌ እትፋቅያት ወደው ወምሮት ዐቅድ እንዴ ኦዳለ እግል ልፈርም እሉ እተ ቀደሙ ከረዩ እሉ ወቀለም ሀበዩ።

ለእናስ ህዬ፣ በይ እለ አቅላም እለ እንታዲ ልጽነሕ እከ ሕብር ብክ ምን ገብኦ እሉ ሀበኒ እለ ግንፍሌዬ እለ እንዴ ጠመዕኑ እለ እግል እርሰም እከ ቤለዩ።

ለምዲር እለ አክል እለ ማል ለመልክ እናስ ለህግያሁ ይአምነዩ ወልተርጀግ እቱ ለሀለ መስለዩ። ሐቀ ብዙሕ መትፋሃም ሳኪን አማኑ ክም ቱ ዶል አከደ። መድረስት እግል ልእቱ ወቅዌት እግል ለኦብዴ ክም ብእቱ ርኦይ ሀበዩ።

ለእናስ ህዬ፣ እለ ርኦይከ ቀደም ዕሰረ ወሐምስ ሰነት ሱዳፍዬ ዐለ። አነ ህዬ ኢትከበትክወ ወእብ ሰበቡ ምነ ዕሰረ ሰኖታት እሸቄ እቱ ለዐልኩ ዐመል ትሳረሕኩ። ወእለ ዋዲ ምን ይዐሌ አላሁ የዕለም አስክ እለ የም ቀፊራይለ መክዘንለ መዐበድ እት አነ እንብር ወሀሌት ቤለዩ። ወለ ግንፍሌህ እዴሁ እንዴ ጠምዐ እተ ደፍተር ረሰመዩ እሉ ወደሐንክ ወሰላመትክ ቤለዩ ከአስክ ዐዱ ትወክለ።

ተበሰም

ምሮት ዲብ ሐቱ ሸሪከት ክም ምወዘፍ ሸቄ ለዐለ ነፈር። እት ወቅትለ ሸቅል እብ ከለጥ ተለፎን አስክ መክተብለ ሙዲርለ ሸሪከት ወደ ከክም እለ ቤለዩ፣ “አዲግ እብ ሰዐይ ሻሂ እንዴ ዐሌከ ከእተ መክተብዬ አምጸኦቲ። ተአከርከ ምን ገብኦ ከየይድ እግል እውዴካቱ እግል ተአምር” ቤለዩ።

ለሙዲር ህዬ .. እንተ ምስል ምን ትትሃጌ ክም ህሌከ አምር ህሌከ? እት ልብል በልሰ ዲቡ። ለሙወዘፍ ህዬ፣ ኢፋልዬ ቤለዩ፣ “አነ ሙዲርለ መአሰሰት አነ ያኦድግ” ቤለዩ። ለሙወዘፍ ህዬ፣ እንተ ህዬ ምስል ምን ትትሃጌ ክም ህሌከ አምር ህሌከ ቤለዩ። ምዲርለ ሸሪከት ህዬ፣ ኢፋልዬ እት ልብል በልሰ ዲቡ። ለሙወዘፍ ህእብ እንክሩ፣ አልሐምዱ ልላህ ቤለ ከለ ተለፎን አዲግ ደብእየ ወእተ አካነ በልሰዩ ንብለኩም።





ነፈሰ ወድ ዕትማን

ቅሻመት

ሐቲ መደት አድግ ወከራይ ዲብ ኦሮ ማይ ወሰዐር ለለአለቡ ምድር ሰቦት ታለው። አምዕል እብ ግዲደ ገይሶ ውዕላም እንዴ ዐለው እብ ሰፍራ ወጽምእ ቅሩብ ሞት በጽሐው። እትሊ ወክድ እሊ ለምድር ሽወየ ዕራይሮ ራክብ ሰቦት ዐለ ዲብ ሐቲ ዶንክ (ኮከን) ማያት ሐዳት ረአው። እሊ ሰድ እሊ ምን ገበዮም ዲብለ ኮከን

ዓዳትን ነአምር

ነፈሰ ወድ ዕትማን ወከራይ ሊትማን እብ ክሱስ ሐልየት፡ ዓዳት ወከድጋ ትግራይት እት ወደወ በሐሰ ወድራሳት፡ ክምሰልሁመ እት ደረጀት ሞባዐት ለአብጸሐው፡ ከዮም ክብት ትግራይት እግል አጅያል ለሐዲሰ ጋብእ ለህለ አክትብት፡ እግል መጽእ አጅያል መትሃግየት ትግራይት ዝሕረት ዐባይ ቱ። ነፈሰ ወድ ዕትማን ወከራይ ሊትማን ህዬ ዲብ ተእሪክ፡ ዓዳትን ወሕላይን ለአግደወ ዶር እብ ቀሊል ለልትረኤ ኢኮን። ክሰፍሐት ፈን ወግዳት እሊ እት አክትብት በዲር ለህለ ርዝቅ ህግያን ክሉ አዳም ጀላብ እግል ልርከቡ፡ ለአምሩ ወልትነፈሰ እቡ፡ እትሊ ዓሙድ እሊ ምን ብዞሕ ጽበጥለ አክትብት ዲብ ነሐራ እንቀድም እኩም ህሌን። ከእግል ዮም'መ ምን እሊ አክትብት እሊ ለአዳሌናሁ ጽበጥ ጀበእ እምለኩም፡ ከቅራኣት በኪተት፡



ኢኖ ሊትማን

ምን ሕላይ ቀዳምያም


ዲባ እት ሰነት 1913 ለጠበዐ ክታብ ሐይለት ትግራይት ዝያድ 800 ለትፈናታ ሐይለት እብለትፈናተው ሐልየት ክሰቱብ ህለ፤ ከእንዴ አትሌና እሊ መሐምድ ዐሊ ወድ ፋላት ምን ሐባብ ዐድ ህብቴስ ከንቴባይ ጃውጅ ክምሰል ሞታ ለቤለየ ሕላየት ክእነ ትብል፡

ማሌ ፈግረ ቤሉና - ምን ደከኖ ወሰምሀር
እግል ልንሰእ ሺመቱ - ንጋረቱ ወመንበር
እግል ለአፍርህ ወለአፍቱ - እብ መናዱቅ ወዐሽከር
ዮም ሞታ ቤሉና - መሰእል እኩይ ኢለአቅብል
አባይክ አቅረደ - ትከረ ምኑ መሰገደል
ፈታይክ ቀርቀረ - ክሉፍ ህለ እብ ሐዘን
እትለበዕልዬ መነዩ - ምን ሐይስ አምበል ደሐን

አንኩለልና ኢኮኒ - ከፎ ኒዴ ወንግበር
እሸዎ እሊ መንባና - ወለእሉ ንትከተል
በዲር አብ አምነ - ምን ክሉመ ልትቀተል
ጸሩ ጸረ ወጸርም - ክቡድ ጸሩቱ ወጀደል
ጋሻይ ዐዱ አቅበለ - እንዶ ጌሰ ክል ክሰር
ወሐር አብመልክ - ገምየ ህመም መሸንገል
አብ-ገደቦ ሰካብ ሚቡ - አምበል ሰሀር
መሓዛት ለጅውጅ ደንኖ - ሰብኡ ልትወዴ ወልትገዐር
አድማይ ደንን ሳሳቱ - ሳክዮታቱ ልትፈንጠር

ስም መሰመም - እግል አባይ ልትበሸል
እት ሐሳስ በርበሬቱ - እት አሰርየት ኢልትክህል
እት ወሓይዝ አብደላምቱ - ለመሓዝ ዐቢ ልጸቅለል
ዐድ ሕድ በጽሕ አብ ሃክብ - ለከረም ምንዲ ትትህንደር
እት አራዊት ኮከባይቱ - ኢለአትፋኔ ልትአዘር
ጽፍሩ ጸብጥ ወአርግሁ - አቡሱሰ ለወንን
ኢህይቦ ቅታሉ - ኢሐድጎ እብ ደልደል
ግሎት በሌዕ እቡ - ዐቅበ ናቅል ወሕመር
ከአዜ ሰኒ ወለድክ - ምንመ ትመይት ትትቀበር
እት ፈረዕ በደ ኢተሐሰብ - ጋንክ ልስከብ ኢልሰሀር

አባይኩም እበዎ - ለተአመሰሎ በዐል አከር
ፈታይኩም ፍተዎ - ለእት ገሮብኩም ልትአመን
ማርሓይ ሰኒ አምርሐዎ - ሰኒ ሊበል ወልግበር
ታይላይ ሰኒ አትልዎ - ደረብኩም እግል ኢልደልደል
ትግራይ ሰኒ አምብር - ዲብኩም እግል ልትከተል
ኢትዝበጦ እብ ሞራ - ወኢተዐይሮ እብ ከንፈር
መቅሰናይ መርባት ብጎነ - ለላሊ ተርህ ዲብ አከር
አዜመ ሰልጣን ብጎነ - ለሹም ግሉይ ረአስ መንበር
አዜመ ጸጋይ ብጎነ - ለጋሾታቱ ልደረር
ለደፈአነ ብጎነ - ገድም ዲብ መን ንሰፍለል፤



እንዴ አወለጠው እግል ልሰተው ሐዘው። ምናተ ለማይ ሐድ ሰቦት ዐለ ክልኢቶም ክምሰል ኢለአረዌ ከራይ ምን ጽባባሐ እግርሰት ሰቦት ዐለት፡ ዲብ አድግ እንዴ ትወለበት፡ “ስመዕ ሐመልሚል፡ እሊ ማይ ክመ ትርእዩ ለህሌክ እግል ለአርዌነ ኢቀድር። ሰቦት እሊ ክልኢትን እግል አድሕድ ሕሳብ እንዴ ወዴክ፡ ሐዳይ ሐዳይ ንስቱ ምን። ምን መለሀዩ ለደቅመ አው ብዙሕ ለሰተ ፍዘ እግል ልግበእቱ” ቲለቱ፡ ኩብደ እት ለሀልክብ ወምራቀ ዲብ ጀብብ።

አድግመ እብ ጀሀቱ እብ ፍጃዕ ልቡ ሸሩፍ ዲብ እንቱ፡ “ሰኒ ሰኒ እብ መልሃይነ ንስቱ” እት ልብል በልሰ እተ። አድግ እግል ሰታይ እዘኑ ገጽ ግረ እንዴ ሻለለ እብ ሸፋግ ቀደም ከራይ ዲብለ ኮከን ቀመ። ወረአሱ እንዴ ኢለሀርስ እብ ርሐብ አፋሁ እግል ሐዳት ማያት ኮከን ጭምም አበለየን ምን። ከራይ ሓርቀት ዲብ እንተ ወእብ ጽምእ ሕልቅመ ዲብ ተንን እግል አድግ ግንሐት ጽፍዐት ተሐይሰ ገንሐቱ። እንተ አድግ ሐድ ውበዙሕ ልብ አለብከ! ኢትሐሰብ! ሕኔት እንዴ ትካፈልነ እንስቱ እብ በይንክ ትጨርብበ?” ቲለቱ።

መስኪናይ አድግ ለእሊ ልብል

ለአተንሰዩ እንዴ ዐለ “ኢኮን ኢኮን አቦቶ እሊ አቅርን ተአመሰሉ ዐልኪ እሊ እዘንዩቱ ማሚ አሰክ እሊ አምረቱ ደዐልኪ?” ዲብ ልብል በልሰ እግሉ።


ከራይ እሊ ከበር እሊ ክምሰል ሰምዐት ፋርሐት ወልውቅት ዲብ እንተ አሰልፍ እብ ሰሓቅ ካርካር ትቤ ወምድር ክሉ ህካት ወዴቱ ወሐር፡ “እብ አማን እሊ አቅርን ኢኮን! እብ አማን እሊ እዘንቱ?” ደግመቱ። ህቱ ህዩ “ዐቢ እሊ! አነ ዛቱ እብኪ እትዐጀብ ህሌኮ።


አሰክ እሊ ምስል ዲብ እኩበር አቅርንዬ ወእዘንዬ ፍርግት ደዐልኪ? ሐሬ እግል ተአሚሩ ለብኪ አቅርን ለቡ ብዕራይቱ

ኢኮን” ክምሰል ቤለየ መርፍዲን ገደ ውበሱተ ረክበት።

ለበዲር ክሉ ለማይ ጫምም ምን ወእብ ቀሀር ቃትለ ለዐለ አድግ፡ እዘኑ እግል ለአርእዩ ሸንከተ ክምሰል ሸአጉ፡ ዲብ ሰሕብ እንዴ አበለት ዲብ ሐንቲህ ኣቴቱ ወዲብ አካኑ ጭውጨ እንዴ አበለት ተለልትል ወዴቱ። አድግ ዲብ ፋርጽ ወራግጽ አምግይቱ ተላተለት ሌጠ። ወእብለ አድግ እብ ቀሻመቱ ኖሱ ዲብ ሸረክ አተ። አከይ ሞት ሞተ። ድራር ከራይ ገብአ።

ምን እሊ ድግም እሊ ሚ እንደርስ?





ናትናኤል ዲብ ክሪቴርየም ፈረንሳ

እት ክሪቴርየም ዓልፊን ልትጃግር ለሀላ ኤርትራ -ናትናኤል፡ እት ካልኣይት መርሐለት ሳልሳይ እንዴ አተ እዴ ለግሊት ረክበ።

እግል 75ይት ኢነቱ ገብእ ለሀላ ብድረ ዐጀላት፡ ማሌ ለሀ መብዝሐ ከረበት ለትመልእ መብትክ ምድር ዲብ 167.3 ኪሎምትር ለገልብብ ዐለ። እት ደንገበ ዲብ ገብእት ጅግረ ሾላታ ህይ፡ ወድ ፈረንሳ ጃልያን አላፍሊፔ እብ 3 ሳዐት፡ 54 ደቂቀት ወ53 ካልኢት እት ልትዐወት እቱ፡ ናትናኤል ተሰፋጹን ህይ፡ እግላ ካልኣይ ለአተ ሪፑብሊክ ካራፓዝ እንዴ ተላ፡ ወቅት እንዴ ኢክሰር እት መነሰት ለትግርጉ ፍገራት እብ ትክምተተ።

ናትናኤል፡ እት አወላይት መርሐለት እብ ዓመት ወቅት 79 ደረጃት ጸብዋ

ዐለ። እብላ ናይ ማሌ ለሀ ፍገራት ላኪን ምነ ማርሓይ ለሀላ ክሪቡፈር ላፖርቲ እብ ደቂቀት ወ35 ካልኢት እንዴ ደንገረ 11 ደረጃት እንዴ አትሓየስ 68ይ ርቱብ ሀለ። ማሌ ህይ ናይ ሳልሳይት ደረጃት ትልህያሁ ዲብ ተዐደ።

እሊ ክእነ ዲብ ሀለ፡ ኤርትራ ነፈር ኢንተርማርፔ-ሰርክሰ-ዋንቲ ላቱ - ቢንያም ግርማይ፡ ሰንበት ዐባይ እት ቤልጁም ዲብ ገብእ ናይ ሐቱ ምዕል ጅግረ ዐጀላት እንዴ ሻረክ ራብዓይ ፈግረ።

እሊ እግል 103 ኢነቱ ገብእ ለሀላ እብ 'ብራሰለስ ሳይክሊስን ክላሲክ' ለልትአመር ጅግረ፡ 207.1 ኪሎምትር ናይ 1.Pro ምቅያስ ለነሰእ ቱ። ምነ እግል ልትዐወቶ ዲብ ሰራያም ለዐለው መትጃግረት ዎሮት ላቱ ቢንያም ህይ፡

ሐቀ ክልኣት ወሬሕ ለሻረክ ዲብ ሰልፋይ ጅግራ ቱ።

መትጃግራይ እሊ ኤርትራ እንዴ ገብእ እግል ልትነሰር ሰራይ ለዐለ ወድ ፈረንሳ - አርትድ ደማር ህይ፡ ምነ መጅሙዐት ዐባይ እግላ መልጪው ከትቀደመው መትባድረት እብ ሸፋገት እንዴ ሐልፈ ተዐወተ። ወቅት ለኢክሰር ቢንያም፡ አሰር ሉንድ ቶቢያስ አንደርሰን ወጆርዲ ምዩስ እንዴ አተ ራብዓይት ደረጃት አድመኑ።

እሊ ወድ 23 ሰነት ሻቱ፡ ለትመጽእ ዮም 9 ጁን ዲብ ስዊዘላንድ ናይ ሐቱ ምዕል ጅግረ እንዴ ወድ፡ ሐቀ ክልኤ ምዕልም ምነ ደውለት እንዴ ኢለኦሪም ሰማን መራሕል እት ብዲብ ጅግረ እግል ልሻርክ ክም ቱ፡ ስታት ጅግራታቱ ለአፍህም።

ሻምፕዮን ኩረት እግር ትሉሉይ አሰመነ

****ፍረቅ በሐር ቀየሕ ወደንደን ንቀጥ ትካፈለው****

ሰንበት ዐባይ ዲብ ገብእ ትልህያታት ሻምፕዮን ኮበራት እግር 'ሱፐር ዲቪዝዮን ኤ' አቅሊም ምግብ፡ ሰእዮም ውቁል ህዩብ ለዐለ ትልህዩ ፍረቅ በሐር ቀየሕ ወደንደን እብ ደሮን ትፈናቱት።

እሊ ፍረቅ፡ አክል-ሕድ 13 ንቅጠት ዲብ ቦም ወእብ ጎል በሐር ቀየሕ ዲብ መሬሕ ቱ ለትዋጅሀው። ካስ ሕርየት እንዴ ነስኦ እትሊ ጅግረ ለትሓበረ ፈሪቅ ደንደን ህይ፡ ሰልፋያት 20 ደቂቅ ትልህዩ ሐን መራቀብቶም አተወ። እት 16ይት ደቂቀት መሃጅም ሳልሕ ሰውድ እብ መቅደረት ፍንቲት አስክ ጎል ለልክዩ ኩረት፡ መዳፍዓይ በሐር ቀየሕ ናኦድ ሀብቶም ዲብ ሽግዲት-ኖሱ ሰበት ወሸቀዩ፡ ደንደን 1-0 ምንመ መርሐው፡ በሐር ቀየሕ ተረቶም እግል ልትፈደው ሰስ ደቂቀት ሌጠ ነስኦ ምኖም።

መሃጅም ዴሸን ግብጻዊ፡ ህይ ምን ጀህት ርክን ለመጽአቱ ኮበራት እብ ዕን ለኢትርእዩ ዝብጠት ሻፍገት እት ሽግዲት ደንደን ከረዩ ወእብሊ ዕርፍ 1-1 ፈግረው።

እት ካልኣይ ሾት በሐር ቀየሕ ክወር ብዞሕ ምንመ ጃረበው፡ ሓርስ ደንደን እግል ልሕለፎ ኢደቅበው። ወእብሊ ክልኢቱ ፍረቅ ጎል ሰበት ይኣተው፡ እት ነቲጀት ፈርግ እንዴ ኢክልቀ ደርን ትፈናተው።

እምበል እሊሙ፡ ዕዳገ ሐሙስ ወኣልታሕሪር እት ወደወ ትልህዩ፡ አልታሕሪር ቀደም ወሐቀ ዕርፍ እብ ወደብ ፍሰሃይ 2-0 ተዐወተው። አልታሕሪር 13 ንቅተት እንዴ አክእለሉ፡ እግላ ቀዴማይ እብ 14 ንቅጠት ልሂርሮ ለህለው በሐር ቀየሕ ወደንደን ናሽብ ዲቦም ሀለ።

አዱሊስ ወማይተመናይ እት ትዋጅሀው ዲብ ትልህዩ፡ 0-0 ምንመ ልትፈናተው፡ ፈሪቅ ማይ ተመናይ እት ሰማን ደቂቀት ሓርሶም እብ ከርት ቀዩሕ ሰበት ትጠረዝ ምኖም፡ ኩለ ለትልህዩ ናቅሳም ዲብ እንቶም እብ 10 መተልህያይ ምን ጋብሀው፡ ሐምዴ ዛይደት ምን መትፈርጀት ረክበው።



እግል ዝክረት አምዕል ሹሀደእ ለትሐሰበ ጅግረ ዐጀላት አቅሊም ምግብ፡ ሰንበት ዐባይ እት ሻሬዕ አፍዐበት ድዋራት ከኒሰት ማርያም አንበተ።

መትጃግረት ዐባይ ወምንተሐት 23 ሰነት ዓማር፡ 121.8 ኪሎምትር መሳፈት ዲብ ትጃገረው። ጅግራሆም እብ ዝክረት ሹሀደእ ክም አንበተው፡ ምን ሰልፋይት ዱረት እንዴ አንበተው እብ ሸፋገት ሰኔት ትበገሰው። ሐቱ ዱረት ዶል ተርፈቶም ህይ፡ መትባድራይ ፈሪቅ ኤሪቴል ሐበን ዐቅባዝጊ ምነ መጅሙዐት ለዐባይ እንዴ መልጪ መትናፍስ እምበል አለቡ እብ 3 ሳዐት 18 ደቂቀት ወ27 ካልኢት ሰልፋይ አተ። ሚሮን ተሾሚ እብ ብሕቶት፡ ሚልክያስ መእከሌ-አሰቤት፡ ሳሚኤል ምስግና ሰምበል፡ ተሰፎም ዐቅባማርያም እብ ብሕቶት፡ መዋእል ግርማይ አሰቤት፡ አክሊሉ አቱሽም ወሳሙኤል ገብራት - ደንደን፡ አሌክሳንደር ኢሳቅ እብ ብሕቶት፡ ወናሆም መንገሻ - ምን ኤሪቴል ህይ፡ አስክ ዓሰራይ ተርቲብ እንዴ አተው ለትዐወተው ቶም።

እብሊ ህይ፡ እብ ወቅት

ጅግረ ዐጀላት አምዕኬ ሹሀደእ ከአካብት



ጅግረ ዐጀላት እግል ዝክረት ሹሀደእ

ክእሉል ሐበን ዲብ ዋሌ፡ ሚሮን እብ አርበዕ ካልኢት፡ ሚልክያስ እብ ሰቦ ካልኢት እንዴ ደንገረው ተለው። ፈሪቅ ኤሪቴል እብ 9 ሳዐት 55 ደቂቀት ወ27 ካልኢት ዲብ መርሐ፡ አሰቤት፡ ሰምበል፡ ወደንደን እብ ሰለስ ካልኢት እንዴ ደንገረው ደርቦም አተው።

ምነ እት 80 ኪሎምትር ለትጃገረው ሸክል (ጁንዳር)

ውላድ፡ እብ ብሕቶቱ መሪሕ ቢተው ተዐወተ። ፍናን ግርማይ -ሰምበል፡ ሳይምን ሰንጋል - ደንደን፡ ኤርምያስ ዐቅባይ - ኤሪቴል፡ ዳንኤል ርእሶም ምን ፈሪቅ ደቡብ፡ ጠዓሚ ንጉሴ - መደበር፡ ያፌት ሰለሙን እብ ብሕቶት፡ ማቲሳላ ኤፍሬም ወሴም እዮብ - ምን አሰቤት፡ ወሳይምን ጴጥርስ - ምን ደንደን ህይ፡ አስክ ዓሰራይ ተርቲብ ሕድ

ንዩል ወደው ከትዐወተው።


እብ ክእሉል ወቅት፡ ፍናን እብ 02 ሳዐት፡ 07 ደቂቀት፡ ወ28 ካልኢት መሬሕ ዲብ ሀለ፡ መሪሕ ወኤርምያስ ደርቡ አተው። ደንደን እብ ፈሪቅ እግላ ገብእ ድንኪክ እብ6 ሳዐት፡ 22 ደቂቀት ወ57 ካልኢት እት ዋሌ፡ ሰምበል ወአሰቤት ህይ፡ እብ አክል ሕድ ወቅት ተልዎ።

መትባድረት አዋልድ'መ፡ እት 80 ኪሎምትር ጽርግዩ ትጃገረዩ። ብርክቲ ፍሰሃይ - ጋላንፍሐ ህይ፡ ጅግረ እግል ልትመም ሰለስ ዱረት ክም ተርፈያሁ፡ መትጃግረት እት ደራባት እንዴ ሐድገት እብ 2 ሳዐት፡ 39 ደቂቀት ወ51 ካልኢት አወላይት አቱት። ርዚና ብርሃኔ -አራግ፡ ቅሳነት ወልዴሚካኤል - ሰራይር ሳዋ፡ ሚዛን ሀብቲሰላሴ ወሞናሊዛ አርኢያ -ፈሪቅ ግብለት፡ ፌሽን ሀይሌ -ሰራይር ሳዋ፡ አድያም ኢሳቅ -ግብለት፡ ዮርዳኖስ ርእሶም -ደንደን፡ ኤደን ተሰፋሚካኤል -ሰራይር ሳዋ፡ ወዊንታ ዮሜ ምን ፈሪቅ ግብለት ህይ፡ ናይ መርሐለት ሰርገል ትሻበቀዩ።

ወእብሊ ብርክቲ እብ ወክድ ክእሉል ዲብ መሬሕ፡ ቅሳነት እብ 48 ካልኢት፡ ርዚና እብ 49 ካልኢት እንዴ ተኣከረዩ ደርቦ አተዩ። ፈሪቅ ግብለት ህይ፡ እብ 8 ሳዐት፡ 1 ደቂቀት ወ42 ካልኢት ሰልፍ ዲብ መሬሕ፡ ሰራይር ሳዋ እብ 2 ደቂቀት ወ13 ካልኢት፡ ደንደን ህይ እብ 5 ደቂቀት ወ22 ካልኢት ተልዉ ክም ህለው፡ ዕላቃት ዓም ናይል ፈደራሽን አክደ።



ዝያረት ርኢሰ ኢሰያስ ዱብ ፈደሬሽን ናብዩ ኢብ ሰወር



ሰወር ወዲዛይን - ታኢዛዝ ኢብርሃ